

## यूहन्नाए उरैःव दर्सन

आव पोस्तोको येसु ख्रीसए ओसाची यूहन्नाए प्राइरानी छींताव ओसरो ज़। नो बेलाक यूहन्नालाई पत्मोस तापुत सगर्द यानैऽयाव (दर्सन १:९)। नोए दर्सनल सात पोकाव मन्दलीरालाई येसुए ओरासिडारो सोनो ओरासम्जैव रैऽया (१:१०-३:२२)। आव मानुवात ताधु पाँर सोनो मानुवा खेमन्या बेला पैकाव पाँर मनी रैऽयार। नो खेमन्या बेलाक ज़ येसु बनै ज़गै मगैवस स्वर्गनी हुद, ओलकिन तँदाडावरालाई सजा याएरिऽयाव (२०:११-१५)। नकिन साःरो नाम नमल ओल उमींरास लिद यापरमेस्वर ब तान्या ले (२१:१-२२:६)।

छींनी हुन्या पाँर

१ आलाव पाँर येसु ख्रीसनी 'छींनी इताव तारिऽया' लिद हुन्या पाँर सर्सिउ लिऽया। नो पाँर उमींरालाई सतैद्यान्याए जूनी परमेस्वरए ओल ओज़ालाई जैक्यो। नो ओज़ाए स्वर्गताव ओचाकर्यालाई डा ओनोकोर यूहन्नाए डाल्योक परींद नो पाँर सतैद्याँक्यो।<sup>२</sup> डा यूहन्नाए परमेस्वरए ओपाँ येसु ख्रीसए सतैंद ओयाँव डारैःव भरी साची डाएऽया।<sup>३</sup> आलाव सर्सिउ हुन्या पाँर जोए प्ररिद थैद दोऽयाव, नो मिँ असिक दैव लिऽया। आव पाँर योऽन्या नजिकक ज़ लिऽया।

सात पोकाव मन्दलीरालाई परमेस्वरए ओअसिक

४ डा यूहन्नाए जे एसिया खन्दलाव सात पोकाव मन्दलीरालाई है डादाचिऽया — डादाकिन ज़ लिऽयाव, आख ब लिऽयाव, छींड पै ब लिऽयाव परमेस्वरए जेल्योदा उयुँ गराँद जेयुरँ होलाँ जैद ओयाचिउक। नो असिक उसिंहासन डाकाव लिऽयाव सात गोता पुरूसनी<sup>५</sup> सोनो येसु ख्रीसनी ब ओताक। येसु ख्रीस ज़ सतलाव

ओसाची, सिउनी सोजूयावराए याड़ाताव, आव मानुवाताव राजाराए याराजा।

गेल्योदा उयुं नाद उजिउ झाःद्याद उझीए गोपापरानी सछेंद पलेःद, 6 गेलाई ओराजूयाल लाँद, ओबाबु परमेस्वरए ओसेवा दान्या पुजारीर जैसिक्यो। नोलाई बनै जगै मगै ब ओताक, नाम नम ओचलैजूयाव ओहक ब खर्क ज माखेमन्या ओताक। आमेन।

7चिऊच्यो, येसु नमतिन बादलरास उहुक प्राई मीए ज ओललाई रँःन्या लेर।

ओललाई घोडद सैःजूयावराए मनी रँःन्या लेर।

आव मानुवाताव प्राई जातलाव मिराए नोलाई यारँःक चिर्लनी बिर्ल घर्न्या लेर।

हैज ओताक। आमेन।

8गोप्रभु परमेस्वरए है लिजूया, “डा अल्फा सोनो ओमेगा ज।\* डा माहान परमेस्वर ज, डादाकिन ज लिजूयाव, आख ब लिजूयाव, छींड पै ब लिजूयाव ज।”

खीसए ओदर्सन यूहन्नाए उरँःव

9डा यूहन्ना जेस परमेस्वरए ओराजूयाल सिप ताद येसु खीसए उमिन्ताव दुखर ब जेस सिप सहिजूयाव जेदाजूयालाई परमेस्वरए ओपाँत येसु खीसए ओसाची डातावए पत्मोस यादोज्याव तापुत सगर्नाकेर। 10 नक प्रभुए उदिन छचाम छैव पुरूसए ब्याल्द डाछींक तोबो भोंकरए बनै घयोःव ओर्गा मिताव डाथैके। 11 नो गाए, “नँ नरँःजूयाव भरी तोबो पोस्तोकोल सर्द एसियालाव सात पोकाव मन्दलीरालाई परींद याएके — तोबो एफिससल, तोबो समुर्नाल, तोबो पर्गाममल, तोबो थिआतीराल, तोबो सार्दिसल, तोबो फिलादेल्फियाल, तोबो लाउदिकियाल।”

1:5 1:5 यसै ५५:४; भज ८९:२७ 1:6 1:6 प्रस १९:६ 1:7 1:7 दान ७:१३; जक १२:१० \* 1:8 1:8 अल्फा सोनो ओमेगाए ओअर्थ — ग्रीक लिपील प्राईरानी डाताव अछेर सोनो प्राईरानी छींताव अछेर ज। 1:8 1:8 प्रस ३:१४

12हाःत ज़ नो डास पाँजूयाव गा काता ओताव लिद डाछींदा डाभाल्सिक सात गोता सुनए दिउ बालन्यार डारारंःके। 13 नो दिउ बालन्याराए खार्ल तोबो मिं मिन्सिउ स्यासोलाई डारंःके। नो उखँत पै बाव रेरे बेन्बेनो क्वा क्वाइसिद उलिज़्याव, ओछातीत सुनए पाता पोःसिउ उलिज़्याव। 14 नोए ओडैताव ओचेम सन मिताव सोनो पेम स्यासो पालो उलिज़्याव। उमी मेंःए मुल्का स्यासो उलिज़्याव। 15 उखँर मेंःल उजालैसिउ पितल स्यासो तिलिक तिलिको उलिज़्याव। ओर्गा भैए ओर्गा मिताव ज़ ओथासजूयाव। 16 वोर्फताव उकुइत सात गोता सोरोर यालिज़्याव। ओयाःत आनी हुनी ओधार ल्यो छाव तरवाली मिताव पलेःद ओनैजूयाव। ओडाः भरी झार झारो निमी स्यासो उलिज़्याव।

17डा नोलाई डारंःव प्राइंना सिउ मिताव ताद उखँत डापछारिसिके। नोए वोर्फताव उकुइ डाक्याँत नैद, “नँ ताछेःनी, डा प्राइरानी डाताव, प्राइरानी छींताव ज़ डालिज़्या। 18 डा जींदो ज़ डालिज़्या। डा तखेप सिद फरी खर्क ज़ मासिन्या ताद डाले। मिंरालाई नर्गल झाःद सैःन्या, नर्गनी पलेःद बाँचैन्या साँचा डाकुइत लिज़्या। 19 है जैद नँ आव नरंःव भरी, आख ताजूयाव पाँर सोनो छींनी हुन्या पाँर सर्द नैके। 20 नो वोर्फताव डाकुइताव नरंःव सात गोता सोरोर सोनो नो सात गोता सुनए दिउ बालन्याराए याअर्थ आव ज़ — नो सात गोता सोरोर सात पोकाव मन्दलीराए यालोम्बार ज़,† नो सात गोता सुनए दिउ बालन्यार सात पोकाव मन्दलीर ज़।”

## 2

### एफिससलाव मन्दली

1“एफिसस मन्दलीलाव लोम्बालाई अइ लिद सर्दिके —

नो सात गोता सोरोर वोर्फताव उकुइत दाद, सात गोता सुनए दिउ

1:13 1:13 दान ७:१३; १०:५      1:15 1:14-15 दान ७:९; १०:६      1:15 1:15 इज  
१:२४; ४३:२      1:17 1:17 यसै ४४:६; ४८:१२      † 1:20 1:20 छुत बुञिन्या — सात  
पोकाव चाकर्यार।

बाल्‌न्या खार्ल दुलिज्यावए है दाचिज्याव,  
 2जे बनै चावस थ०रिद धामास जेदोज्याव येन डा डसैज्या।  
 बलेज्याव मिंरालाई ब जेखार्ल जेमारासहिए। यानी ज़ येसुए  
 ओसाची मिताव जैसिद बारिज्यावरालाई मनी जाँचिद यापाँ धुत  
 थरैद जेराएज्या। 3जे बनै थ०रिद डामिनताव दुखर सहिन्या जेर्च्या  
 मासिए लिन्या ब डसैज्या।

4खाली जेडैत आव पाँ वाज़ लिज्या — जे उस०कताव डाल्योदा  
 जेयुँ थू जेजैज्याव मिताव आज्याल ते माले। 5है जैद जे कान्किन  
 मेदा जेतेव हो चेतैद जेयुँर त्तोद फरी डादाडाव जेदोज्याव मिताव  
 ज़ दोचिके। जेमादोकिन जेल्योक हुद जेदिउ बाल्‌न्या ओपोतिन  
 डाहाइरिज्या। 6हैदी ब आःपै जेस तोबो गुन ते लिज्या —  
 निकोलाइतस यारादोज्यावराए यायेनलाई जेसोज्या। नोरालाई डा  
 मनी डारासोज्या।

7आव पाँर जोए थैन्या उयुँ लिज्या, होए छैव पुरूसए मन्दलीरालाई  
 है ओरादोव पाँर ओथैवक। आव पाँत जो झैःस्या ताज्या, होलाई  
 परमेस्वरए ओबगैचाल लिज्याव अजम्बरी जुनी याज्याव सै  
 ज्याव डाएरिज्या।”

### स्मुर्नालाव मन्दली

8“स्मुर्ना मन्दलीलाव लोम्बालाई अइ लिद सर्दिके —  
 आव पाँ प्राइरानी डाताव, प्राइरानी छींताव, सिद सैसिउए है  
 दाचिज्याव,

9जे जेदुखर ब डारैःज्या, जेस काता ज़ ओमालिज्याव ब डसैज्या।  
 हैदी ब प्राइनी योव ज़ जेलिज्या। नो सैतानए ल्योदाडाव ‘गे यहूदीर  
 ज़’\* है लिज्यावराए जेडैत माचाव पाँर झाःद यायाचिज्याव ब  
 डसैज्या। 10 नो जेदैरिज्याव दुखरानी ताछेच्यो। सैतानए जेलाई

2:7 2:7 उत ३:९; इज २८:१३; ३१:८  
 बुझिन्या — गे परमेस्वरए ओथोर ज़।

2:8 2:8 यसै ४४:६; ४८:१२ \* 2:9 2:9 छुत

जाँचिन्याए जूनी रूवा रूवारालाई इयालखानाल ब झाःचिरिजूयाव।  
निताव दुखर दस दिन पै वाज तारिजूया। जेजिउ ओबादी ब  
सिन्याक पै डासतत जेलिकिन, डा जेलाई अजम्बरी जुनीए इनाम  
यान्या डाले।

11आव पाँर जोए थैन्या उयुँ लिजूया, होए छैव पुरूसए  
मन्दलीरालाई है ओरादोव पाँर ओथैवक। आव पाँत जो झैःस्या  
ताजूया, नो मिँ नर्गल बाव मापरिए।”

### पर्गाममलाव मन्दली

12“पर्गामम मन्दलीलाव लोम्बालाई अइ लिद सर्दिके —

आनी हुनी ओधार ल्यो छाव तरवालीस लिजूयावए है दाचिजूयाव,  
13जे जेपोल सैतानए ओराजूया लिजूया लिन्या डासैजूया। हितावत  
मनी डामिनत थोरिद डापाँ जेमारासजूयाव ब डासैजूया। निताव  
सैतानए ओराजूयाल डासतत लिजूयाव डासाची एन्तिपासलाई  
जेखाल यासैःक मनी जेयेन जेमारासके।

14खाली जेडैताव पाँर तोबो नेब्लो लिजूयार। जेखानी रूवा  
रूवाराए बालामए ओदोव मिताव येन दोजूयावर लिजूयार। नो  
बालामए इस्राएलीरालाई पापल पारैन्याए जूनी तोबो बालाक  
यादोजूयावलाई चें थाँव उपरींव मिताव ज़ ताके। ननी ज़ नो  
इस्राएलीराए अडग्यालाई चरैःसिउ जूयावर ज़्याद, पातर्या पातर्नी  
जैसिद या मनी झुथो ज़ तानाकेर। 15 हिताव ज़ फरी जेखानी रूवा  
रूवार निकोलाइतस यारादोजूयावराए यापाँ दान्यार ब ताकेर। 16 है  
जैद जे हतपत ज़ जेयुँर तोचिके, मानी नो डायःताव आनी हुनी  
ओधार ल्यो तरवालीस जेल्योक हुद नोरास लरैँ दान्या डाले।

17आव पाँर जोए थैन्या उयुँ लिजूया, होए छैव पुरूसए  
मन्दलीरालाई है ओरादोव पाँर ओथैवक। आव पाँत जो झैःस्या

ताज्ञ्या, होलाई मोंसिउलाव मन्न डाएरिज्ञ्या, सोनो तोबो साःरो मिन सर्सिउ पाल पालो लुँ ब डाएरिज्ञ्या। नो मिन नोए वाज़ सैन्या ले।”

### थिआतीरालाव मन्दली

18“थिआतीरा मन्दलीलाव लोम्बालाई अइ लिद सर्दिके —

उमी मेंःए मुलका मिताव, उखँ उजालैसिउ पितल स्यासो लिज्ञ्याव परमेस्वरए ओज़ाए है दाचिज्ञ्याव,

19जे बनै थंरिद परमेस्वरए ओसतत लिद नैं मेंलाई समारिद परमेस्वरए ओसेवा जेदोज्ञ्याव डारैःज्ञ्या। नो जेयेनर डादाडावकिन यादा ज़ ताद ले।

20खाली जेडैत तोबो पाँ वाज़ लिज्ञ्या। नो परमेस्वरए उपुरूस चरिद पाँव जैसिज्ञ्याव ईजेबेल मेंमालाई जेखाल जेसुमज्ञ्या। नोए डासेवा दोज्ञ्याव डामीरालाई तँदा लाँद पातर्या पातर्नी येनर दाव परींद, अडग्यालाई चरैःसिउ ज्ञ्यावर ज्ञ्याव यापरींज्ञ्याव। 21 डा नो मेंमालाई उयुँर तोन्या मौका डाएके, खाली नोए ओयेनर रासो ज़ माभैःए। 22 है जैद डा नोलाई आकिनी ओस्याँज्ञ्याव तैलाई ओजोरो हुव स्याँन्या तैं जैद डाएरिज्ञ्या। ओल्योदा बाज्ञ्यावरालाई मनी यायुँर यामातोकिन बनै छे छे डम्सिउ दुखर डाराएरिज्ञ्या। 23 नोए ओज़ारालाई नुल्पा नुल्मा जैद डाराखेम्रिज्ञ्या। हाःकिन मिँराए यायुँ याकलर ज़र्लापद डाराएज्ञ्याव प्राई मन्दलीराए सैन्या लेर। डा जेलाई सु सु जेयेनए ओजेला डायचिरिज्ञ्या।

24जे उपुर्काव थिआतीराल लिज्ञ्यावर ते निताव सैताननिकाव हुव ‘बनै ओअर्थ ल्यो ओलेखा ल्यो पाँ’ है यादोज्ञ्याव पाँत माबाद साचो येमदा ज़ जेबाज्ञ्या। है जैद डा जेलाई उपुर काता ज़ है डामादाचिए, 25 खाली जेस लिज्ञ्यावलाई मारास्द डा डामाहुवा पै थंरिद लिच्यो।

26 आव पाँत जो झेंःस्या ताद छींङ पै डायेनत थ०रिजूया, डा होलाई प्राइँ राज्याराए याडैताव जैन्या डाले। 27 किताव डा मनी डाबाबुए ल्योनी निताव हक रैद डानै, हिताव ज़ डा नोलाई ब यान्या डाले। नो याडैताव ताद उकुइत झँए झुइ रैद गम जा मितावरालाई छिलिङ्गा छिलिङ्गा ख्यान्या ले। 28 डा नोलाई छकाल्न्याकाव सोम्पा ब यान्या डाले।

29 आव पाँर जोए थैन्या उयुँ लिजूया, होए छैव पुरूसए मन्दलीरालाई है ओरादोव पाँर ओथैवक।”

### 3

#### सार्दिसलाव मन्दली

1“सार्दिस मन्दलीलाव लोम्बालाई अइ लिद सर्दिके — ओलस परमेस्वरए सात गोता उपुरूसर लिजूयाव, उकुइत सात गोता सोरो लिजूयावए है दाचिजूयाव, जेयेन भरी रँःद डानै। जे जेमिन चाव ओतादी ब जेयेननी ते काम मालागिउ सिउ स्यासो ताद जेले। 2 है जैद जे सैसिद माव पैजूयाव रहिउ जेयेनरालाई याराजागैचिके। जेयेन भरी परमेस्वर डाबाबुए ओङ्गाक काता ज़ योव डामारँःताए। 3 है जैद परमेस्वरए ओपाँ कितावनी जेदैव, कितावनी जेथैव हो चेतैद, जेयुँर त्तोद हितावनी ज़ दोचिके। जे फरी सैसिद जेमालिकिन डा कुना हुजूयाव मिँ स्यासो सुए ज़ यामासैद जेल्योक उमँःजानी डाहुरिजूया।

4 हैदी ब नो सार्दिसल लिजूयावरानी ख्वा ख्वाराए ते आःपै याक्वात हिला मासगाल्तार। नोर ड़ास पालो क्वा क्वाइसिद बारिन्या लेर। नोर वाज़ निताव दैन्याकावर लिजूयार। 5 है जैद आव पाँत जो झेंःस्या ताजूया, होए पाल पालो क्वा क्वाइसिरिजूया। डा नोलाई अजम्बरी जुनीलाव पोस्तोकोल सर्सिउ उमिन क्वालघ्यान्या डामाले, बुरू डाबाबु सोनो ओचाकर्याराए याङ्गाक उमिन ज़

सथास्घान्या डाले।

6आव पाँर जोए थैन्या उयुँ लिज्या, होए छैव पुरूसए मन्दलीरालाई है ओरादोव पाँर ओथैवक।”

फिलादेल्फियालाव मन्दली

7“फिलादेल्फिया मन्दलीलाव लोम्बालाई अइ लिद सर्दिके — ओखत माल्यो छैव, सतस लिज्याव, दाऊदए ओराज्यालाव साँचा नैज्यावए स्वर्गताव ग्राम फैन्या सोनो गल्न्या ओल उकुइत ज़ लिज्या। ओफैक सुए ज़ मागल्धुर, ओगल्क सुए ज़ माफैधुर। निताव उकुइत नैज्यावए है दाचिज़्याव,

8जेयेन भरी डासैज़्या। जेसक्ती छ्या उलिदी ब डापाँ दाद डामिनत जेलाज ओमाहुवए जेड़ाक तोबो ग्राम फैद नैद डयाचिए। नो ग्राम सुए ज़ मागल्धुर। 9 नो सैतानए ल्योदाडाव 'गे यहूदीर ज़' है लिद धुतैज़्यावरालाई तछा जेखँत फुलुप्सिउ डारापरीरिज्या। हो ताकिन डा डायुँ जेस उलिज्याव ओल्यो लिन्या याज़ सैन्या लेर। 10 जे बनै थोरिद डापाँ भरी धिद जेदोवए आव मानुवाताव मिँ भरिरालाई जाँचिन्याए जूनी बनै धो सहिउ दुखर झाःद डाराएक जेलाई ते नो दुखरानी पाथस ज़ डापलेःचिरिज्या।

11डा हतप्त ज़ डाहुरिज्या। जेदैरिज्याव इनाम सुए ज़ माछकैधुन्याए जूनी जेस लिज्याव डापाँर डासतर मारासूद दोच्यो। 12 आव पाँत जो झेंःस्या ताज्या, होलाई परमेस्वर डाबाबुए उझिमलाव खाँबा मिताव डाजैरिज्या। नो ननी खर्क ज़ भोसन्या माले। डा नत सोम्लो मिन डार्रिज्या, तोबो परमेस्वर डाबाबुए उमिन, तोबो स्वर्गतिन हुज्याव परमेस्वरए ओसहर साःरो यरूसलेमए उमिन, तोबो साःरो डामिन।

13आव पाँर जोए थैन्या उयुँ लिज्या, होए छैव पुरूसए



मन्दलीरालाई है ओरादोव पाँर ओथैवक।”

लाउदिकियालाव मन्दली

14“लाउदिकिया मन्दलीलाव लोम्बालाई अइ लिद सर्दिके —  
उमिन ‘आमेन’ लिज्याव, ओबाबुए ओसतत लिद थोरिउ  
साची याज्याव, परमेस्वरए ओसिस्तीलाई थालिद्याज्यावए है  
दाचिज्याव,

15जे जेयेन भरी डारँ:ज्या, जे डायेनत राव ब जेमाले, छेरो ब जेमाले।  
की राव वाज, की छेरो वाज जेताकिन तान्या ओल्यो। 16 खाली  
जे की राव की छेरो माताद नोल नोलो वाज जेतावए डायःनी  
डावै:चिरिज्या।

17जे है जेलिज्या, ‘गे यादा ताद प्राइँनी योद धनी ताद गेले,  
गेलाई काताए खाँचो ज़ माले,’ है जेलिज्या। जे ते झन काता ज़  
माल्यो, नाडग्या, युँ नाव, छाम छामो ताद जेलिज्यावदा जेमासैए।

18 डा जेलाई तोबो पाँ डायचिज्या, जे साचो धनी तान्या ताकिन  
डा डाल्योनिकाव में:ल उजालैसिउ सुन लँ:चिके। नो नाडग्या  
पात्या ताद जेलिज्यावनी जेलाजर कपन्या ताकिन डाल्योनी पालो  
क्वार लँ:द क्वाइसिचिके। नो छाम छामो ताद जेलिज्यावनी जेमी  
सरँ:न्या ताकिन डाल्योनी मील झा:न्या मलम लँ:द थीचिके।

19जोलाई डा मया डादोज्या, होलाई हपकैद डाम:लैज्या। है जैद  
जेयूर मासतेद जेयूर तोद डायेनत कलँ लिचिके। 20 डा यामक  
च्यौ:सिद कोतो कोतो डाजैक जोए डार्गा थैद ओयाम फैज्याव,  
डा होए उझिमल पसिद होस नै नै ताद ज्यावर ब सिप ज़ ज्यान्या  
गिन्ले। 21 आव पाँत जो झे:ज्या, होलाई डसिंहासनत डस सिप  
चुसिउ यान्या डाले। डा मनी डादा डाझे:वए परमेस्वर डाबाबुए  
उसिंहासनत ओलस सिप चुसिद गिन्ले।

22आव पाँर जोए थैन्या उयुँ लिज्या, होए छैव पुरूसए

मन्दलीरालाई है ओरादोव पाँर ओथैवक।”

## 4

### स्वर्गताव राजा

1 आव भरी डारँ:वत फरी स्वर्गत तोबो याम फैसिउ डारँ:के। हा:त ज़ नो ड़ादाडाव डाथैव भोंकरए ओर्गा मितावए फरी ब डास अइ लिद पाँके, “आत डाल्योत हुन्के, नँलाई छीनी हुन्या पाँर सतैद डारँरिज्ञ्या,” 2 है ओदाँव प्राइँना ज़ डाक्याँत परमेस्वरए उपरूस हुद ज़जल्किद स्वर्गत तोबो सिंहासन डारँ:के। नत तोबो राजा चुसिद उलिज्ञ्याव। 3 नो राजाए ओज़गै ज़वाँड ज़वाँडो यूँखार स्यासो ओरँ:ज्ञ्याव। ज़गै ज़गैव मुगा स्यासो ब ओरँ:ज्ञ्याव। सिंहासन घवाँगिल झिली मिलिउ रिगाउँ स्यासो ओरँ:ज्ञ्याव। 4 नो सिंहासन घवाँगिल छुत चौबीस गोता सिंहासनर यालिज्ञ्याव। नल चुसिद लिज्ञ्याव चौबीस जना स्रेर, पालो क्वा क्वाइसिउर, सुने मुकुत जासिसिउर यालिज्ञ्याव। 5 नो सिंहासननी बिजुली उमिल्किज्ञ्याव, गर्जिज्ञ्याव गार ब याहुज्ञ्याव। सिंहासन ड़ाक सात गोता दिउ बाल्न्यात में: तै:सिउ उलिज्ञ्याव। नो में:र परमेस्वरए सात गोता उपुरूसर ज़। 6 नो सिंहासन ड़ाक छैँ छैँव समुन्द्र स्यासो यूँखार मिताव मैरा ब उलिज्ञ्याव।

नो सिंहासनलाव चार कोन्याक याड़ानी याछींनी यामी ल्योर चारता जनतुर यालिज्ञ्याव। 7 नो चारतार तोबो ला स्यासो उलिज्ञ्याव, तोबो बाछा स्यासो उलिज्ञ्याव, तोबोए ओडा: मिँए ओडा: स्यासो उलिज्ञ्याव, फरी तोबो भुर्ज्याव काप्च्यागा स्यासो उलिज्ञ्याव। 8 नो चारता जनतुर छ छ गोता याकर ल्योर, याक्याँ भरी ब यामी ल्योर यालिज्ञ्याव। नोराए लाकनी रील चिम मादाद,  
“अ परमप्रभु बनै नसक्ती ल्यो गेपरमेस्वर,

4:3 4:2-3 इज १:२६-२८; १०:१  
4:6-7 इज १:५-१०, २२; १०:१४

4:5 4:5 प्रस १९:१६; इज १:१३; जक ४:२

4:7

नँ नखत माल्यो छैंव, छैंव, छैंव नलिज्या।  
 डादाकिन ज़ नलिज्याव, आख ब नलिज्या, छींङ पै ब लिन्या नले,”  
 है ल्यो ज़ यालिज्याव। 9 नोराए नो याङाकाव सिंहासनत चुसिद  
 लिज्याव, एकमन्या जिउँव ज़ लिज्याव राजालाई ओमान नैद्याद,  
 उमिन सघ्योःद्याद, धन्याबाद याचरैःज्याक, 10 नो चौबीस जना  
 सेरर सिंहासनत चुसिद लिज्यावए ओङाक फुलुप्सिद, नो एकमन्या  
 लिज्यावलाई धो दाद, याङैताव मुकुतर हाइद उखँक झाःद अइ  
 ल्यो ज़ यालिज्याव,  
 11“अ गेप्रभु परमेस्वर,  
 प्राङरानी घेप्पा मिन,  
 प्राङराए ल्योनिकाव मान,  
 प्राङरानी घ्योःव सक्ती दैन्याकाव ब नँ ज़ नलिज्या।  
 ताव भरी नँ ज़ नजैके,  
 नयुँ स्यानी ज़ ताकेर।”

## 5

पाथा सोनो छाप झाःसिउ पोस्तोको

1नो सिंहासनत चुसिद लिज्याव राजाए वोर्फताव उकुइत तोबो  
 आनी हुनी सर्सिउ पोस्तोको डारँके। नो पोस्तोकोत सात गोता  
 छाप झाःद पोःसिउ उलिज्याव। 2 हाःत ज़ परमेस्वरए तोबो  
 बनै ओर्सा ल्यो ओचाकर्याए, “नो पोस्तोकोताव झाःसिउ छाप  
 हाइद पोस्तोको फैधुन्या सुवार मालिज्यार?” है लिद उकिज्याव  
 डाथैके। 3 खाली नो फैद चिऊधुन्यार स्वर्गत, मानुवात, तलना  
 नामल ब यामालिज्याव। 4 हाःत ज़ नो पोस्तोको फैधुन्यार  
 चिऊधुन्यार सु ज़ यामारादैवए बनै डाघर्के। 5 हाःत ज़ नो चौबीस  
 जना सेररानी तोबोए, “ताघर्नी, यहूदाए ओथोलाव ‘ला’ यादोज्याव,

दाऊद राजाए ओजरानी परीव, झें:स्या तावए नो पोस्तोकोलाव सात गोता छापर हाइद फैधुन्याकाव लिज्या,” है दाँक्यो।

6हा:त ज़ नो चार कोन्याल लिज्याव जन्तु मितावर सोनो चौबीस जना सेरराए याखाल तोबो सिद सैसिउ पाथा स्यासो सिंहासन डाक च्याँ:सिद उलिज्याव डारँ:के। नोए उरँ:र ब सात गोता, उमीर ब सात गोता यालिज्याव। नो सात गोता उमीर परमेस्वरए आव मानुवात आदा होदा ओरापरींव सात गोता उपुरूसर ज़। 7 हा:त ज़ नो पाथा सिंहासनत लिज्याव राजाए ल्योक बाद वोर्फताव उकुइताव पोस्तोकोलाई रैक्यो। 8 ओरैव प्राईना नो चार कोन्यालाव जन्तु स्यासोर सोनो चौबीस जना सेरर पाथाए ओडाक फुलुपसिकेर। नोरास सारङ्गर सोनो सुने खुरील झा:सिउ धुपर ब उलिज्याव। नो धुप परमेस्वरए छैव उमीराए पोंखारिद याचरै:व यापारँ ज़।

9नक याबाक सा:रो गित ब तोबो अइ लिद गैकेर,  
“नो पोस्तोको लाँद ओछापर फैधुन्याकाव नँ वाज़ नलिज्या।

नँ मिँराए कुइनी सै:सिद,

परमेस्वरए उजूनी

प्राईं राज्यालाव मिँर,

प्राईं जातलाव मिँर,

प्राईं थोलाव मिँर,

प्राईं खामनिकाव पाँज्याव मिँरालाई

नजिउ झा:द नझीए नरानिखनैके।

10नोरालाई परमेस्वरए ओराज्यालावर जैद ओसेवा दान्यार नराजैके।

नोराए ज़ आव मानुवात नँ नराज्या चलैन्या लेर।”

11हा:त ज़ फरी डाभाल्सिक सिंहासनत चुसिउ राजा, ओड़ाकाव जन्तु मितावर सोनो चौबीस जना सेरर यालिज़्याव घ्वाँगिल परमेस्वरए बनै कुधु ओचाकर्याराए यार्गा ज़ डाथैके। नोर हजारका हजार, लाखका लाख यालिज़्याव। 12 नो चाकर्यार प्राइँए यार्गा तोबो जैद अइ लिद यागैज़्याव,  
 “प्राइँनिकाव सक्ती, प्राइँनिकाव धन, प्राइँनिकाव बुद्धी, प्राइँनिकाव सा, प्राइँनिकाव मान, प्राइँनिकाव असिक, प्राइँनिकाव घेप्पा मिन दैन्याकाव

नो यासै:व पाथा वाज़ लिज़्या।”

13नकिन परमेस्वरए ओरासिजैँवर, सूवर्गतावर, मानुवातावर, तलना नामलावर, समुन्द्रल लिज़्यावर प्राइँए ज़ तोबो गा जैद अइ लिद यागैज़्याव डाथैके,

“सिंहासनत चुसिज़्याव राजा सोनो यासै:व पाथानिलाई असिक, मान, घेप्पा मिन सोनो सक्ती ब एकमून्या ज़ ओताक।”

14ना: भरिल नो चारता जन्तु स्यासोराए, “आमेन,” है ल्यो ज़ यालिज़्याव। नो चौबीस जना सेरर ब ओड़ाक फुलुप्सिद ओसेवा दोव ज़ यानैज़्याव।

## 6

### पाथाए पोस्तोकोताव छाप ओराफैव

1हा:त ज़ नो पाथाए नो सात गोता छापराणी प्राइँरानी डाताव छाप ओफैव डारँ:के। नो छाप ओफैव प्राइँना नो चार जन्तु स्यासोरानी तोबोए ओर्गा नम ओगर्जिज़्याव मिताव गर्जिद, “आदा हुन्के,” है ओदाँज़्याव डाथैके। 2 होदा डाभाल्सिक तोबो पालो घोरालाई चेप्सिउ उकुइत ली ल्योलाई डारँ:के। नोलाई तोबो मुकुत एकेर। नोए ननी बाद ओड़ालाव परिउ भरी याहारैनाक्यो।

3नकिन फरी नो पाथाए, होए उछींताव पोस्तोकोताव छाप ओफैवत

नो चारता जन्तु स्यासोरानी तोबोए, “आदा हुन्के,” है ओदाँज्याव डाथैके। <sup>4</sup> हाःत ज़ होदा डाभाल्सिक तोबो घ्यामो घोरा पुलुसुद उहुज्याव डारँःके। नो घोरा चेप्सिउलाई आव मानुवाताव मिरालाई माखैन्या जैद या याल सैःसिउ परीन्या हक यासिउ उलिज्याव। नोलाई तोबो घ्योःव तरवाली ब यासिउ उलिज्याव।

<sup>5</sup>नकिन फरी नो पाथाए नोनी निछींताव पोस्तोकोताव छाप ओफैवत नो चारता जन्तु स्यासोरानी तोबोए, “आदा हुन्के,” है ओदाँज्याव डाथैके। होदा डाभाल्सिक तोबो मोलो घोरा चेप्सिउ उकुइत तौला ल्यो डारँःके। <sup>6</sup> नो चारता जन्तुराए खार्नी तोबो गा अइ लिद ओपाँज्याव डाथैके, “तछाकाव जेलाए जम्मा तमानु ताम, की सोमानु चिका तान्या ले। मास सोनो दाखमद्यलाई ते चलैन्या माःक।”

<sup>7</sup>नकिन पाथाए नो सोम्लोराए याछींताव पोस्तोकोताव छाप ओफैक नो चारता जन्तुरानी पाइँरानी छींतावए, “आदा हुन्के,” है ओदाँज्याव डाथैके। <sup>8</sup> होदा डाभाल्सिक तोबो पींल्यासो घोरा चेप्सिउ डारँःके। नोए उमिन ‘सैःन्या’ उलिज्याव। नोए उछीं उछीं नर्ग ब उहुज्याव। नोनिलाई आव मानुवातावरालाई चार भानी तभालाई तरवालीनी, अनिकालनी, बेथारानी, ला निमरानी सैःन्या हक यासिउ उलिज्याव।

<sup>9</sup>नकिन पाथाए नो चारता छापराए याछींताव छाप ओफैक परमेस्वरए ओपाँत साची यावर यारासैःवराए यापुरूसर स्वर्गताव थान धूँल डारारँःके। <sup>10</sup> नो पुरूसर बनै चोइस अइ लिद याकिज्याव, “अ सतलाव छैँव माहान गेप्रभु, नँ न्याय दाद मानुवातावराए गेलाई सैःद गेझी सोभोद यायासिउ गेखिस खर्क फेरैद नयासिरिज्याव?” है यालिज्याव। <sup>11</sup> हाःत ज़ नो पुरूसरालाई पालो क्वा तोबो तोबो याद, “जे मिताव परमेस्वरए उमिनताव यारासैःरिज्याव जेनैर

यामादुमा पै जे जाँवा सहिद कींव ताके,” है यारादोव डाथैके।  
 12नकिन नो पाथाए नो पाँच गोता छापराए याछींताव छाप ओफैव  
 प्राइंना नाम भरी थोनोःसिके, निमी ब मोलो फेरवा स्यासो मोल मोलो  
 ज़ ताके, स्यावै ब झी मिताव घ्याम घ्यामो ताके। 13 घ्योःव बतासए  
 सीर ओराहलैक सीं सैर ओरासतेजूयाव मिताव नमताव सोरोर ब  
 नामल तेकेर। 14 नम लो माँःती रूलूसिके, हाँर तापुर यापोनी ज़  
 भोसूद बाकेर। 15 मानुवाताव राजार, मिँराए याघेपुपार, यासेनापतीर,  
 धनीर, हक दैवर सोनो बाँदार माबाँदार हाँ खँ जीदा, पुप जीदा  
 मोसिनाद, 16 नोराए, “आव हाँर पहरर गेतर्त तेद गेलाई कपूद  
 सिंहासनत चुसिद लिङ्ग्याव राजा सोनो पाथाए उरिसनी यामोसिकिन  
 ताखेहो। 17 नोनी निरिस सोभोन्या छचाम हुद ले, नोनी निङ्गाक सु  
 ची उरहिधुरिङ्ग्याव?” है यालिङ्ग्याव।

## 7

## तलाख चवालीस हजार मिँर

1आव भरी ओतावत आव मानुवाताव चार कोन्याल परमेस्वरए  
 ओचाकर्यार चार जना च्याँःसिद यालिङ्ग्याव डारारँःके। नोराए  
 नामल तादी ब, समुन्द्र तर्त तादी ब, सीत तादी ब, बतास ताचलिक  
 लिद नोलाई वैद यानैङ्ग्याव। 2 हाःत ज़ फरी तोबो चाकर्या पुर्ब  
 त०नी उहुङ्ग्याव डारँःके। नोए उकुइत जीदो परमेस्वरए ओछाप रैद  
 नो चार कोन्याल लिङ्ग्याव नाम सोनो समुन्द्र बलेना हुव चार जना  
 चाकर्यारालाई बनै चोइस है यादोक्त्यो, 3 “गे परमेस्वरए उमिनताव  
 ओबाँदाराए याचाँदीत छाप झाःद गेमाराएवा पै जे नामलाई ब  
 ताबलेःच्यो, समुन्द्रलाई ब ताबलेःच्यो, सींलाई ब ताबलेःच्यो।”  
 4हाःत ज़ इस्राएली बाह थरनी नो छाप दैवर तलाख चवालीस हजार  
 ताकेर है याल्यो डाथैके।

6:12 6:12 यसै १३:१०; योए २:१०,३१; ३:१५ 6:13 6:13 यसै ३४:४ 6:15 6:15  
 यसै २:१९,२१ 6:16 6:16 होसे १०:८ 6:17 6:17 योए २:११; मला ३:२ 7:1  
 7:1 यर ४९:३६; दान ७:२; जक ६:५ 7:3 7:3 इज ९:४-६

5नोर यहूदाए ओथोनी बाह्व हजार,  
 रूबेनए ओथोनी बाह्व हजार,  
 गादए ओथोनी बाह्व हजार,  
 6आसेरए ओथोनी बाह्व हजार,  
 नप्तालीए ओथोनी बाह्व हजार,  
 मनस्सेए ओथोनी बाह्व हजार,  
 7सिमियोनए ओथोनी बाह्व हजार,  
 लेबीए ओथोनी बाह्व हजार,  
 इस्साखारए ओथोनी बाह्व हजार,  
 8जबूलूनए ओथोनी बाह्व हजार,  
 योसेफए ओथोनी बाह्व हजार,  
 बेन्यामीनए ओथोनी बाह्व हजार ताकेर।

स्वर्गताव मागनिसिधुन्या प्राइँ जातलाव मिँर

9आव भरी ओतावत फरी ब डाभाल्सिक सुए ज़ मागनिसिधुन्या  
 प्राइँ राज्यालावर, प्राइँ जातलावर, प्राइँ थोलावर, प्राइँ स्वामनी  
 पाँज़्याव मिँर बनै माहोल्या यालिज़्याव डारारं:के। सिंहासनत  
 चुसिद लिज़्याव राजाए ओड़ाक सोनो पाथाए ओड़ाक च्याँ:सिद  
 नोर प्राइँए ज़ पाल पालो क्वा क्वाइसिद याकुइत खजुरए  
 ओस्यावलार रैद, 10 प्राइँए तोबो गा जैद,

“सिंहासनत चुसिज़्याव गेपरमेस्वर

सोनो पाथानी निल्योनी

अजम्बरी जुनी दैन्या ताद गेले,”

है लिद क्रिउ ज़ यालिज़्याव। 11 हा:त ज़ सिंहासन, चौबीस जना  
 सेरर सोनो चारता जनतु स्यासोर यालिज़्याव च्वाँगिल च्याँ:सिद  
 लिज़्याव चाकर्याराए परमेस्वरए ओड़ाक फुलुप्सिद धो दाद है  
 लिकेर,

12“आमेन। गेपरमेस्वरलाई खर्क ज़ माखेम्न्या असिक,

ज़गै मगै, बुद्धी,



धन्याबाद, मान, सक्ती,  
ओर्सा ल्यो ब ओताक। आमेन।”

13हाःत ज़ नो चौबीस जना सेररानी तोबोए डालाई, “आव पालो क्वा क्वाइसिउर सुर, कातानी हुवर, नँ नमासैजूया?” है ओदोँक ते, 14 “प्रभु, डा ते डामासैए। नँ ते नसैजूयाखेहो,” है डादोक ते, नोए डालाई, “आवर मानुवाताव घेप्पा जाँचरानी पुलुसूद हुवर ज़। नोराए याक्वार पाथाए छैव उझीए छेद सपालूद नैर।

15है जैद ज़ नोर परमेस्वरए उसिंहासन ड़ाक ल्यो दैद ओल उलिजूयाव छैव पोल लाकनी रील ओसेवा दाव ज़ नैजूयार। नो सिंहासनत चुसिजूयावए फरी नोरालाई कपूद पाथस नैन्या ले।

16नोर खर्क ज़ करेन्या मालेर,  
री ब छोसून्या मालेर,

निमीए ओदारए हिपूद घाम सोता सोता ब तान्या मालेर।

17नो सिंहासन ड़ाक लिजूयाव पाथा नोराए यार्गे गावला ताद पाथस नैद,

अजम्बरी जुनी याजूयाव रीमुलदा लाँद री सवैन्या ले।

ओल परमेस्वरए ज़ प्राइँराए यापिलर सीद्यान्या ले।”

## 8

पाथाए प्राइँरानी छींताव छाप ओफैव

1नकिन नो पाथाए प्राइँरानी छींताव छाप ओफैक स्वर्गत आधा घन्ता पै साइँसुइँ ताके। 2 नकिन परमेस्वरए ओड़ाकाव सात जना ओचाकर्यार डारारँःके। नोरालाई सात गोता भोंकर याद ओरानैजूयाव।

3हाःत ज़ परमेस्वरए छुत तोबो ओचाकर्या हुद धुप झाःन्या सुने जा उकुइत रैद सिंहासन ड़ाकाव सुने थानक च्याँःसिहुके। नोलाई

नो थानत परमेस्वरए छैव उमीराए यापोंखारिउ पाँत चाःद्यान्याए जूँनी कुधु धुपर याद यानैजूयाव । 4 नो धुपए उमिकुइ परमेस्वरए छैव उमीराए यापोंखारिउ पाँस थोमसिद नो चाकर्याए उकुइनी ज़ परमेस्वरए ओड़ाक केस्के । 5 हाःत ज़ फरी नो चाकर्याए नो थानताव मैरैः ओजाल झाःद मानुवात ख्याक्यो । ओख्याव प्राइँना ज़ नम बनै गर्जिद म्याल्याकनी मिलिक ताद भोंचालो बाके ।

### सात गोता भोंकर

6हाःत ज़ नो याकुइत भोंकर ल्यो सात जना परमेस्वरए ओचाकर्यार याभोंकर तपून्यात थूसिकेर ।

7उसंक्तताव चाकर्याए ओभोंकर ओतबो प्राइँना झी बरेःसिउ तिसरै सोनो मेंः बनै ज़ वाके । नोए मानुवाताव सीर सोंभानी तभा भरी नामस ज़ सघाद चुयाप याजैक्यो । छी भरी ब ओपोःस ज़ सघाद याखेम्क्यो ।

8नकिन नोए उछींताव चाकर्याए ओभोंकर ओतबोत बनै घ्योःव हाँ स्यासो मेंःए सुम्ला समुन्द्रल तेद नो समुन्द्र सोंभानी तभा भरी झी ज़ ताके । 9 फरी नो समुन्द्रलाव यास० ल्यो भरी सोंभानी तभा भरी सिकेर । समुन्द्रलाव जहाजर मनी सोंभानी तभा भरी खेम्केर ।

10नकिन फरी नोनी निछींताव चाकर्याए ओभोंकर ओतबोत नमतिन तोबो बनै घ्योःव चाँःजूयाव मेंः स्यासो सोरो तेद रीमुलर सोनो खोलार सोंभानी तभा भरिल परिके । 11 नो सोरोए उमिन 'अइरालु' । नो परिउ भरिलाव री भरी बनै काव अइरालु मिताव ज़ ओतावए नो री ओजूयाव मिर कुधु ज़ सिकेर ।

12नकिन नो सोम्लोराए याछींताव चाकर्याए ओभोंकर ओतबोत निमी, स्यावै सोनो सोरोर सोंभानी तभा भरी चुम चुमो ताकेर । है जैद ला मनी सोंभानी तभा भरी चुम चुमो ज़ ताके । हिताव ज़ री मनी

8:3 8:3 आमो ९:१; प्रस ३०:१,३

8:5 8:5 लेबी १६:१२; इज १०:२; प्रस १९:१६

8:7 8:7 प्रस ९:२३-२५; इज ३८:२२

8:10 8:10 यसै १४:१२

8:11 8:11 यर ९:१५

सोभानी तभा भरी छाम छामो ज्ञ ताके।

13नकिन फरी डाभाल्सिक नमत तोबो कापच्यागा उभुर्ज्याव डारें:के। नो बनै चोइस अइ लिद उकिज्याव, “नो आ:पै यामातपताव सोम्लो भोंकर परमेस्वरण ओचाकर्याराण यातबोत आव मानुवाताव मिँरालाई सोखेप थैए माँतकन तारिज्या,” है उलिज्याव डाथैके।

## 9

1नकिन नो चारताराण याछींताव चाकर्याए ओभोंकर ओतबोत नमतिन तोबो सोरो नामल ओतेव डारें:के। नो सोरोए उकुइत फरी सुन्द मुन्दौ भल्खादालाव साँचा यासिउ उलिज्याव। 2 नोए नो भल्खादालाई ओफैक बनै घयो:व में:नी पुलुसज्याव मिकुइए सुम्ला स्यासो पुलुसुद नमत बाद निमीलाई लाम लुम कपुद चुम चुमो जैक्यो। 3 नो मिकुइनी नाम भरिल स०ल०र पुलुसुकेर। नोरालाई बिछी मिताव दान्या सक्ती यासिउ उलिज्याव। 4 नोरालाई आव मानुवाताव छीर सीर सोनो पीव भरिलाई कैज माजैद, याचाँदीत परमेस्वरण ओछाप माल्यो मिँरालाई वाज दुख यान्या हक यासिउ उलिज्याव। 5 नोरालाई सै:न्या हक ते यासिउ ओमालिज्याव, अइज पाँच मैना पै दुख याद थलैन्या वाज उलिज्याव। नोराए याराएज्याव दुख बिछीए ओराकैकाव उहुज्याव मिताव दुख ओताज्याव। 6 नो बेलाक मिँराए ‘इताव दुखर ओताज्याव देखा बुरू सिन्या ओताकिन ताखेहो’ है लिन्या लेर। खाली नोर सिन्या बेला ओमाहुवा पै सिउ दैन्या मालेर।

7रें:क ते नो स०ल०र लरेंदा बान्या झा:सिद लिज्याव घोरा स्यासोर यालिज्याव। नोराए याडैत सुने मुकुत मिताव जासिसिउ, याडा: मिँराए याडा: मिताव उलिज्याव। 8 नोराए याचेम मेंमाराए याचेम

8:12 8:12 यसै १३:१०; इज ३२:७; योए २:१०, ३१; ३:१५ 9:29:2 उत १९:२८ 9:3  
9:3 प्रस १०:१२-१५ 9:4 9:4 इज ९:४ 9:6 9:6 अयू ३:२१; यर ८:३ 9:7 9:7  
योए २:४

स्यासो उलिज्याव, याहा लाराए हा स्यासो उलिज्याव। 9 नोराए याछातीत झँए पाता मिताव जासिसिउ उलिज्याव। नोराए याकरर याचलैक घोरार लरैदा गद्दी सेल्द याधोःनाज्याव मिताव गा ओथासजूयाव। 10 नोराए यार्मेः बिछीए ओर्मेः मिताव ओधास ल्यो उलिज्याव। नत ज़ मिँरालाई पाँच मैना पै दुख यान्या सक्ती उलिज्याव। 11 नोराए याडैताव राजा भल्खादाल लिज्याव चाकर्या ज़। नोए उमिन हिलू खामनी 'एबाद्दोन', ग्रीक खामनी 'अपोल्लियोन'।

12नो भोंकरए ओर्गाए ओरैव उसंक्ताव थैए माँतकन नो ज़ ओल्यो। फरी थैए माँतकन रैन्यानी अझ नेब्लो भोंकरनी लिज्यानी।

13नकिन नो पाँच जनाराए याछींताव चाकर्याए ओभोंकर ओतबोत परमेस्वरए ओड़ाकाव सुने थानकाव चार चोंच्याकाव स्यारँःराए खानी तोबो गाए 14 नो भोंकर तपूज्यावलाई अइ ओदोज्याव डाथैके, “नो घ्योःव यूफ्रेतिस भैलाव सुर्सिउ चार जना चाकर्यारालाई यापलानाके,” है ओदोक ते, 15 यापलानाक्यो। नोर मिँ भरिरानी स्रोभानी तभा भरिलाई सैःन्याए जूनी नो साल, नो मैना, नो छ्याम, नो घन्ताक पै नक ज़ झाःसिसिउ यालिज्याव। 16 नोराए घोरा चेपन्या याफौजीर बीस करोद लिज्यार है यालिज्याव डाथैके।

17नो झजल्किद डारारँःव घोरार सोनो नोराए यातर्त बान्यार डारारँःक नो घोरा चेपूज्यावराए याछातीताव याजासिज्याव पाता गन्धकए ओर्मेः स्यासो घ्याम घ्यामो सोनो पीं पींव उलिज्याव। याघोराराए याडै लाराए डै स्यासो उलिज्याव। यायाःनी मेंः, मिकुइ सोनो गन्धक उपुलुसूज्याव। 18 नो यायाःनी पुलुसो मेंः, मिकुइ सोनो गन्धकनी मिँ भरिरानी स्रोभानी तभा भरिलाई याराखेम्केर। 19 नो

घोराए यासक्ती यायाःत ब उलिज्ज्याव, यार्मेःत ब उलिज्ज्याव।  
नोराए यार्मेःत घुलए ओडैः स्यासो उलिज्ज्याव। ननी ज़ मिँरालाई  
खदम याराख्याकेर।

<sup>20</sup>हितावत मनी नो नुल्पा नुल्मानी बाँचिउ मिँराए ड़ादाडाव  
यादोज्ज्याव माचाव यायेन मारास्केर। नोराए दै देवताराए यासेवा  
दान्या ब मारास्केर। कुइए जैसिउ सुन चाँदी, पितल, सीं लुँ, आरा  
उरू मालिज्ज्याव, माथैज्ज्याव सोनो मारैःज्ज्याव अडग्ग्या सेवा दान्या  
ब मारास्केर। <sup>21</sup>मन्तर तन्तर दान्या, मिँर सैःन्या, कुन्या, पातर्त्या  
पातर्नी जैसिन्या ब मारास्केर।

## 10

### जिम्ज़ा पोस्तोको रैज्ज्याव चाकर्या

<sup>1</sup>नकिन तोबो बनै ओर्सा ल्यो चाकर्या बादल क्वाइसिद स्वर्गतिन  
उहुज्ज्याव डारैःके। नोए ओडैत रिगाउँ जासिद उलिज्ज्याव, ओडाः  
निमी स्यासो उलिज्ज्याव, उखँर मेंःए मुल्का स्यासो उलिज्ज्याव।  
<sup>2</sup> नोए उकुइत तोबो जिम्ज़ा पोस्तोको फैसिउ उलिज्ज्याव। नोए  
वोर्फताव उखँ समुन्द्र तर्त ओनैज्ज्याव, दाबर्त्याफताव उखँ नाम तर्त  
ओनैज्ज्याव। <sup>3</sup> नोए लाए ओर्गा मिताव जैद बनै चोइस उक्किक सात  
गोता गर्जिन्याराए मनी यार्गा सथास्द पाँकेर। <sup>4</sup> नो गर्जिज्ज्यावराए  
यापाँ सर्न्यात डाथूसिक, स्वर्गतिन फरी छुत तोबो गा अइ लिद  
हुके, “नो सात गोता गर्जिज्ज्यावराए यापाँ मासर्द छाप झाःद सोके।”  
<sup>5</sup>हाःत ज़ नो तँफताव उखँ समुन्द्र तर्त, तँफताव उखँ नाम तर्त  
लिज्ज्याव चाकर्याए वोर्फताव उकुइ स्वर्गदा छींद, <sup>6</sup> नाम नम,  
समुन्द्र सोनो नलाव ताव भरी जैज्ज्याव एकमून्या जिउँव ज़  
लिज्ज्याव परमेस्वरए उमिन छुद अइ लिद पाँके, “अब ते धिलो  
तान्या माले। <sup>7</sup> प्राइरानी छींताव चाकर्याए ओभोँकर ओतबोत  
परमेस्वरए ओसेवा दोज्ज्याव अगमबत्तारालाई है ओरादोव मोंसिउ

पाँर योःन्या ले।”

8हाःत ज़ नो डादा स्वर्गनी हुव गा फरी ब तखेप डास अइ लिद पाँके, “नँ आनी बान्केदा, नो तोबो उखँ समुन्द्र तर्त, तोबो उखँ नाम तर्त लिज्यावए उकुइताव पोस्तोको हाइद रैके,” है ओदाँक ते, 9 डा नो चाकर्याए ल्योक बाद, “नो नकुइताव जिम्जा पोस्तोको डालाई याव ताके,” है डादोक ते, “ताए, लाँकेदा, आव भरी ज़्युयो। आवए नफूलाई सकाद्यान्या ले, नयाःलाई ते राप मिताव सताद्यान्या ले,” है ओदाँव प्राइँना, 10 उकुइताव जिम्जा पोस्तोको रैद डाज्युक डायःत राप मिताव ता ता ताके। डागालो छीनी डाफू बनै काके।

11हाःत ज़ फरी तोबो गा अइ लिद ओपाँज्याव डाथैके, “नँ फरी ब प्राइँ राज्यालावर, प्राइँ जातलावर, प्राइँ खामनी पाँज्यावर सोनो राजाराए याक्याँत हुन्या पाँर पाँव परिरिज्या।”

## 11

### परमेस्वरए नेबरेँ ओसाचीनी

1हाःत ज़ डालाई तोबो भाता स्यासो गोइँन्या ताङ्गा याँकेर। नकिन तोबोए है दाँक्यो, “नँ आनी बाद परमेस्वरए ओध्यान झिम ओथानस ज़ गोइँयो। नल हुज्याव ओसेवा दोज्यावरालाई मनी यागनियो। 2 नो ध्यान झिमलाई नगोइँक, पाखाताव मैरा भरी रास्यो। नो भरी परमेस्वरकिन तँदाडावरालाई यासिउ लिज्या। नोराए परमेस्वरए उमिनताव सहरलाई बयालीस मैना भरी याखँए छिल्न्या लेर। 3 नो बेलाक ज़ नेब्लो डासाचीनिलाई बाह सय साथी दिन भरी बर्ला क्वा क्वाइसिद परमेस्वरए ओपाँ सथैन्या हक यान्या डाले।”

4नो नेब्लो साचीनी नेब्लो जैतून सीनी ज़। नो नाम नमलाव

परमेस्वरए ओड़ाकाव नेब्लो दिउ बालून्यानी मनी नोनी ज़।  
 5 सुवाराए नोनिलाई कैवार जैव यापैकिन नोनी नियाःनी मेंः पुलुसुद  
 नोरालाई चुयाप ख्यान्या लिनी। फरी नोनिलाई कितावनी सैःव  
 यापैजूयाव, या मनी हितावनी ज़ सिरिज़्यार। 6 नोनी परमेस्वरए  
 ओपाँर निरासथैव बेलाक पै, नम घमावाक लिद नम सूडन्या,  
 रीरालाई झी पल्लतैन्या सोनो निपैजूयाव मिताव मानुवात नुल्पा  
 नुल्मा रैन्या सक्तीर ब नोनी निकुइत ज़ तान्या ले।

7 नोनी साची यान्या नियेन ओखेमोत भलखादानी तोबो बनै छे  
 छे डम्सिउ जन्तु पुलुसुद नोनिलाई खपूद हारैद निसैःरिजूयाव।  
 8 नोनी निमोरोर यरूसलेम सहरलाव दोहाक अइज्ज ख्यासिउनी  
 तान्या लिनी। नो सहरल ज़ निप्रभुलाई मनी क्रुसत तङ्गैद यासैःव।  
 है जैद नो सहरए उमिन सदोम है दादी ब ताके, इजिप है दादी ब  
 ताके। 9 नोनी निमोरोलाई आधास चार दिन पै खादरल माझाःद  
 पाखाक ज़ यारानैजूयाव। प्राई राज्यालावर, प्राई जातलावर, प्राई  
 थोलावर सोनो प्राई खामनी पाँजूयाव मिँराए नो मोरोनिलाई रँःद,  
 10 बनै खुसी ताद यारेंतए याकुइताव सरैसर ब या याल भाःसिन्या  
 लेर। नो नेब्लो अगमबक्तानी मानुवात निलिक मिँरालाई यापापत  
 उथुपुल निराजैवए निसिउत बनै रँकेर।

11 नोनी निसिउ आधास चार दिन ओतावत परमेस्वरए ल्योनी  
 बाँचैन्या स० फरी निक्याँत हुद नोनी सोद च्याँःसिकिनी। निताव  
 रँःद नो रँःजूयावर याछ्याचेए बनै भुम भुम गूकेर। 12 हाःत ज़  
 नोनी स्वर्गनी 'आदा हुचिन्के' है लिन्त्या गा तोबो थैद बादल जील  
 स्वर्गदा बाकिनी। नोनी निबाजूयाव निसुतुर भरिराए ब यारारँःकेर।  
 13 हाःत ज़ बनै घ्योःव भोंचालो हुद सहरलाव झिम भरी दस भानी  
 तभा भरी धलिकेर। मिँर मनी सात हजार सिकेर। उपुर्कावर बनै

11:4 11:4 जक ४:३,११-१४ 11:6 11:6 १ राज १७:१; प्रस ७:१७-१९; १ समू ४:८

11:7 11:7 दान ७:७,२१ 11:8 11:8 यसै १:९-१० 11:11 11:11 इज ३७:१०

11:12 11:12 २ राज २:११

छेःद स्वर्गताव परमेस्वरए उमिन बनै सघ्योःदिकेर। 14 दोस्रो थैए माँतकन नो ज़ ओल्यो। अझ थैए माँतकन रैन्या तोबो लिज्या। नो हतपूत ज़ हरिज्या।

प्राइरानी छींताव भोंकर

15हाःत ज़ प्राइरानी छींताव चाकर्याए ओभोंकर ओतबोत स्वर्गतिन बनै घ्योःव घ्योःव गार अइ लिद थास्केर,  
“आव मानुवाताव राज्यार गेपरमेस्वर सोनो ओखतैव ख्रीसनी निराज्या ज़ ताद ले।

नोए नो राज्यालाई एकमून्या ओल ज़ चलैन्या ले।”

16हाःत ज़ नो परमेस्वरए ओड़ाकाव सु सु यासिंहासनत चुसिज्याव चौबीस जना सेरर परमेस्वरए ओड़ाक फुलुपुसिद धो दाद, 17 अइ लिद पाँकेर,

“अ परमप्रभु, भाःकिन लिज्याव, छींङ पै लिज्याव बनै नसक्ती ल्यो गेपरमेस्वर,

नँलाई धन्याबाद गेचरैःनिज्या।

बनै घ्योःव सक्ती नकुइत रैद,

नराज्या चलैन्यात नथूसिके।

18प्राइँ जातलाव मिँर डादाकिन नँलाई रँःद यारिस चोद बनै यामचिज्याव।

अब ते नोराए डैत नरिस थुद्यान्या बेला हुके,

सिधुवरालाई नराफालरिज्याव बेला ब हुके।

फरी छैव नमीरालाई, नसेवा दोज्याव अगमबत्कार, नमान नैद्याज्यावर, घेपूपा जिम्जारालाई इनाम नराएरिज्याव बेला ब हुके।

हाःत ज़ आव मानुवा बलेःज्यावरालाई यामिन समैद्यान्या नले।”

19हाःत ज़ स्वर्गताव परमेस्वर उलिज्याव ध्यान झिम फैसिद नो



बाचा नैसिउ मुधुस ब रैं:के। नो ध्यान झिमनी म्याल्याकनी मिलिक ताद गर्जिन्या गार पुलुस्केर। नाम ब थोनो:सिद घ्यो:व घ्यो:व तिसरै ब तेके।

## 12

### मेंमा सोनो अजिङ्गर

<sup>1</sup>हा:त ज़ नमत तोबो बनै अचम्बलाव सरेस रैं:के। नत तोबो मेंमा निमी स्यासो झार झारो क्वाइसिसिउ, उखँ धूँल स्यावै, ओडैत बाह गोता सोरोए मुकुत जासिसिउ उलिज़्याव। <sup>2</sup>नो मेंमा ज़ा दैन्या ताद बनै घर्लिद ओघर्ज़्याव।

<sup>3</sup>नकिन फरी ब नमत तोबो सरेस रैं:के। नत तोबो बनै घ्यो:व घ्यामो अजिङ्गर पुलुस्द उलिज़्याव। नोए ओडैर सात गोता, उरैं:र दस गोता यालिज़्याव। सात गोता ओडैत मुकुत जासिसिउ उलिज़्याव। <sup>4</sup>नोए ओर्मे:ए नमताव सोरोर सोंभानी तभा भरी स्लेद् नामल याख्याक्यो। नो अजिङ्गर फरी, “नो ज़ा दैन्या घर्लिज़्याव मेंमाए ज़ा ओदैवत डाकैया,” लिद ओडाक वैसिद उलिज़्याव।

<sup>5</sup>नो मेंमाए खेपा ज़ा दैक्यो। नो ज़ प्राईं राज्यालाव मिँरालाई उकुइत झँए झुइ रैद राज्या चलैहुरिज़्याव मिँ। नोलाई परमेस्वरए स्वर्गताव ओपोल ज़ छींद लाँक्यो। <sup>6</sup>नो मेंमा फरी परमेस्वरए मोसिन्या पो जैद ओयोए धो:द बनड मोसिनाके। नड ज़ बाह सय साथी दिन डासिके।

<sup>7</sup>हा:त ज़ स्वर्गत घ्यो:व लरैं ताके। मिखाएल\* ओचाकर्यारास नो अजिङ्गरस लरिनाकेर। नो अजिङ्गर मनी ओचाकर्यार रैद मिखाएलस लरिद, <sup>8</sup>यासार् खेम्द स्वर्गताव यालिन्या पोनी हारिद पुलुस्केर। <sup>9</sup>नो अजिङ्गर स्वर्गतिन नामल ख्यासिके। नो दियाबलस यादोऽ्याव भा:किनकाव घुल, मानुवाताव मिँरालाई झुकैज़्याव

11:19 11:19 प्रस २५:१६; १ राज ८:९ 12:3 12:3 दान ७:७ 12:4 12:4 दान ८:१०  
12:5 12:5 यसै ६६:७; भज २:९ \* 12:7 12:7 यहू १:९ चिऊन्या। 12:7 12:7 दान  
१०:१३, २१; १२:१

सैतान ज़। नो मेल ओख्यासिक ओचाकर्या भरी ब ओलस ज़ तेकेर।

10 फरी स्वर्गत तोबो बनै घयोःव गा अइ लिद ओपाँजूयाव डाथैके, “अब ते गेपरमेस्वर प्राईनी झेंःस्या ताद, ओसत्तीरास ओराजूया ब तयार जैद नैव।

नो राजूया चलैन्या हक ओज़ा येसु ख्रीसए ओल उकुइत ज़ रैद नैव। अब ते गेदाजूयु भाइरालाई लाकनी रील परमेस्वरए ओड़ाक छचाप लैजूयाव सैतान स्वर्गतिन नामल ख्यासिके।

11 परमेस्वरए उमिनतावर ते नो पाथाए उझीनी परमेस्वरस खैवर यातावए,

सोनो याजिउए मया मादाद परमेस्वरए ओपाँत साची यान्यात जात्त ज़ यामारासोए,

सैतानलाई हारैद याज़ झेंःस्या ताकेर।

12 है जैद जे स्वर्गत लिजूयावर प्राई रेंचिके।

जे मानुवात सोनो समुन्द्रल लिजूयावरालाई ते थैए माँतकन ज़ लिजूया।

काराव ल्यो ताकिन सैतान जेल्योल ख्यासिद, ‘डाबेला छचा ज़ लिजूया’ लिद बनै ज़ रसिद ले।”

13 नो अजिङ्गर नामल ओख्यासिउत नो खेपा ज़ा दैव मेंमाए उखिरी पसिनाके। 14 हाःत ज़ नो अजिङ्गरए ओड़ाकिन भुर्द बनडाव उलिन्या

पो जैसिउड केसून्याए जूनी नो मेंमालाई घेप्पा कापूच्यागाए ओकर नेब्लो यासिउ उलिजूयाव। नो बनल आधास चार बर्स डासिके।

15 नो अजिङ्गरए फरी नो मेंमालाई रीए गबगैवक लिद ओयाःनी बनै घयोःव भल ख्यादिक्यो। 16 नामए नो मेंमालाई सघैन्याए जूनी नो

अजिङ्गरए ओयाःनिकाव री भरी नाम फैसिद होल ज़ सझाल्दिक्यो।

17 निताव रँःद नो अजिङ्गर नो मेंमास झन ज़ उरिस चोद ओज़ा

भरिरास ज़ लरैँ दोनाक्यो। नोए ओज़ार परमेस्वरए ओपाँर दाद येसुए ओसाचीत लिज़्यावर ज़।

18हो बेलाक नो अजिङ्गर समुन्द्र छचोकाव बालुवाल च्याँःसिद उलिज़्याव।

## 13

अजिङ्गरए ल्योनी हक दैव राछचास

1हाःत ज़ समुन्द्रनी तोबो बनै छे छे डम्सिउ राछचास मिताव पुलुसुद उहुज़्याव डारैँःके। नोए उरैँःर दस गोता, ओडैर सात गोता यालिज़्याव। दस गोता उरैँःत तोबो तोबो मुकुत जासिसिउ उलिज़्याव। सात गोता ओडैत फरी तोबो तोबो परमेस्वरकिन स०द युँ माजामो मिनर सर्सिउ उलिज़्याव। 2 नो डारैँःव राछचास च्याँकुला स्यासो उलिज़्याव, उखँर निमए उखँ स्यासो उलिज़्याव, ओयाः घ्योःव लाए ओयाः स्यासो उलिज़्याव। नोए ओसक्ती, ओराज्या, ओहक भरी नो अजिङ्गरए ल्योनी दैद ओनैज़्याव। 3 नोए ओडै भरिनी तोबो ओडैत सिवा जप जैद पल्सिउ घाइनी गरॉव मिताव ज़ डारैँःके।

मानुवाताव मिँ भरिए नोलाई रँःद अचम्ब ताद उछीं उछीं ज़ याबाज़्याव। 4 नोए उछींत बाज़्यावराए, “आव राछचासए ओहक भरी अजिङ्गरए ल्योनी ज़ उहुव ओल्यो,” लिन्या सैद, नो अजिङ्गरए ओसेवा दोकेर, सोनो, “आव राछचासकिन घेप्पा सु ची उलिज़्याव? आवस लरैँ दाधुन्या ब सु ची उलिज़्याव?” लिद नोए ओसेवा मनी दोकेर। 5 नो राछचासलाई फरी परमेस्वरकिन स०द परमेस्वरस याः दान्या, सोनो ओमन लागिउ येन दान्या बयालीस मैना पै हक यासिउ उलिज़्याव। 6 है जैद ज़ नोए परमेस्वरए उउपत माचाहिउ पाँर झाःद, उमिनर बले-द्याद, परमेस्वर उलिज़्याव पो सोनो स्वर्गताव परमेस्वरए उमीराए याडैत ब

माचाहिउ पाँर झाःद पाँके। 7 नोलाई परमेस्वरए छैव उमीरास लरें दाद नोरालाई हारैधुन्या हक यासिउ उलिज्याव। नोए ओहक भरी प्राई राज्यालावर, प्राई जातलावर, प्राई थोलावर, प्राई खामनिकाव पाँज्यावराए याडैताव ज़ ओल्यो। 8 है जैद आव नाम नम ओमातादकिनकाव अजम्बरी जुनीलाव पोस्तोकोल यामिन माल्यो भरिए नोए ओसेवा दान्या लेर। नो पोस्तोको सैःसिउ पाथाए उकुइत लिज्या।

9 है जैद जोए थैन्या उयुं लिज्या, नोए चावस ओथैवक।

10 हो बेलाक जोलाई इयालखानाल बान्या जैसिउ लिज्या, हो इयालखानाल ज़ बान्या ले।

जोलाई तरवालीए सैःन्या जैसिउ लिज्या, हो तरवालीनी ज़ सिन्या ले।

आनी ज़ परमेस्वरए छैव उमीर थ०रिद युं हुबो ताव परिके।

### छीनीकाव राछचास

11 नकिन फरी ब नाम जीनी पुलुसो छुत तोबो राछचास डारेंःके। नोए उरेंः पाथाए उरेंः स्यासो नेब्लो उलिज्याव, ओर्गा अजिङ्गरए ओर्गा स्यासो उलिज्याव। 12 नोए नो डादाडाव राछचासए ओहक भरी ओचलैज्याव, आव मानुवाताव मिँरालाई नो डादा ओडै पल्सिउ घाइ गरॉव स्यासो राछचासए ओसेवा दाव ओरापरीज्याव।

13 नोए अचम्बलाव सरैसर जैद नमतिन मानुवात मेंः मुल्कार ब मिँराए याडाक सतेद ओराएज्याव। 14 नोए नो डादाडाव राछचासए ल्योनिकाव ओरैव हकरानी अचम्बलाव सरैसर जैद आव मानुवाताव मिँरालाई झुकैद नो डादा ओडै तरवालीए पल्सिउ गरॉव राछचासए अङ्ग्या तोबो जैव यापरीक्यो। 15 नोए नो अङ्ग्यालाई उस० झाःद्यान्या सक्तीर दैद नोलाई पाँधुन्या जैक्यो। हाःकिन नो अङ्ग्याए ओसेवा दाव माभैःज्याव भरिरालाई सैःव

यापरींक्वो। 16 नकिन नोए मिँ भरिरालाई घेप्पा ज़िम्ज़ा, धनीर गरीबर, बाँदा माबाँदार प्राइँलाई ज़ वोर्फताव याकुइत तादी ब, याचाँदीत तादी ब, तोबो सरेस झाःव यापरींक्वो। 17 नो सरेसत नो राछ्यासए उमिन कितर ओनमर झाःसिउ उलिज़्याव। नो सरेस माल्योराए सुए ज़ काता ज़ लँःव यामादैज़्याव, काता ज़ योःव ब यामादैज़्याव।

18 आव बुझिन्याए जूँनी गहक चाहिज़्या। जोए ओगहक लिज़्या, होए नो राछ्यासए ओनमर ओसैवक। नो नमरए तोबो मिँए उमिन सतैँज़्याव। नोए ओनमर छ सय छयसथी ज़।

## 14

पाथा सोनो याखत माल्यो मिँ

1 हाःत ज़ फरी तखेप डाभाल्सिक परमेस्वरए ओपाथा स्वर्गताव सियोन दाँदात च्याँःसिद उलिज़्याव डारँःके। नोस याचाँदीत ओल उमिन सोनो ओबाबुए उमिन सर्सिउ तलाख चवालीस हजार मिँर यालिज़्याव। 2 हाःत ज़ स्वर्गतिन बनै घ्योःव रीए ओर्गा सोनो नम गर्जिज़्याव मिताव गा उहुज़्याव डाथैके। नो डाथैव गा मिँराए सारङ्ग यातपूज़्याव मिताव ज़ ओथासूज़्याव। 3 नोराए परमेस्वरए उसिँहासन डाक, चारता जन्तु मितावराए याडाक सोनो चौबीस जना स्मेराए याडाक साःरो गित तोबो यागैज़्याव। नो गित सैँज़्यावर परमेस्वरए आव मानुवानी फुर्सुल ओराजैव तलाख चवालीस हजार उमीराकिन सुए ज़ यामासैँज़्याव। 4 नोर पातर्या पातर्नी माजैसिउ बनै छैँवर परमेस्वरए ओपाथाए उछीँ उछीँ बाज़्यावर ज़। नोर आव मानुवाताव मिँ भरिरानी लँःसिउ, परमेस्वर सोनो ओपाथानी निजूँनी उसकताव उथैसिउर ज़। 5 आवराए यायाःत धुत पाँ ब काता ज़ माहुइ, कान्त ज़ याखत माल्योर लिज़्यार।

सोंबरें ओचाकर्यार याक्रिउ

6हा:त ज़ फरी ब तोबो चाकर्यालाई नमत उभुर्ज्याव डारँ:के। नोलाई आव मानुवाताव प्राइँ राज्यालावर, प्राइँ जातलावर, प्राइँ थोलावर, प्राइँ खामनी पाँज्याव मिँरालाई खर्क ज़ माखेमन्या चाव था सथैन्या यासिउ उलिज्याव। 7 नो बनै चोइस अइ लिद किके, “परमेस्वरलाई रँ:द छे:द ओमान नैदिचिके, मिँ भरिरालाई ओराफाल्रिज्याव छचाम हुद ले। है जैद नाम नम सोनो समुन्दर रीमुलर जैज्यावए ओड़ाक फुलुप्सिद ओसेवा दोचिके।”

8हा:त ज़ फरी नोए उछीं उछीं छुत तोबो चाकर्या हुद अइ लिके, “खदम ताके! नो बनै उमिन थासो बेबिलोन सहर खदम ज़ ताके। नोए प्राइँ जातलाव मिँरालाई ओदोज्याव पातनी येननी समँ:द याफसङ्गैक्यो।”

9नकिन फरी नो नेब्लो चाकर्यानी निछीं निछीं छुत तोबो चाकर्या हुद अइ लिद किके, “सुवाराए नो राछचास सोनो नोए उसुरूप जैसिउ अङ्ग्यानी निसेवा दाद राछचासए ओछाप याकुइत तादी ब, याचाँदीत तादी ब, याझा:किनी, 10 नोरालाई मनी परमेस्वरए उरिसलाव मासचिरिसिउ चर्कासो दाखमद्य मिताव उखुरीनी सवैन्या ले। नोर पाथाए ओड़ाक सोनो परमेस्वरए छैँव ओचाकर्याराए याड़ाक गन्धक सोनो में:ल मासहिसिधुन्या दुख दैन्या लेर। 11 नलाव दुख याज्याव मिकुइ खर्क ज़ खेमन्या माले। जोराए नो राछचास सोनो उसुरूप जैसिउ अङ्ग्यानी निसेवा दाद राछचासए उमिनताव छाप रैज्यार होराए लाकनी रील खर्क ज़ सन्च दैन्या मालेर। 12 परमेस्वरए ओपाँर भैँ:द येसुलाई यायुँ हुपुज्याव छैँव उमीर आव पाँत थ०रिद ल्यो परिके।”

13हा:त ज़ फरी स्वर्गनी तोबो गाए अइ उलिज्याव डाथैके, “आव सर्के, आकिनी प्रभुए उमिनत सिज्यावर असिक दैवर तान्या लेर।”

छैंव पुरूसए ब, “हैज़, नोर यायेननी यासा नैन्या लेर, याजेला ब याछीत ज़ हुन्या ले।”

मानुवाताव बाली सिम्न्या बेला

14 हाःत ज़ फरी तोबो बनै पाल पालो बादल तर्त मिं मिन्सिउ मिताव चुसिद उलिज़्याव डारंःके। नोए ओडैत सुने मुकुत जासिउ, उकुइत बनै छाव राँकासी क्योःद ओनैज़्याव। 15 फरी स्वर्गताव ध्यान झिमनी परमेस्वरए ओचाकर्या तोबो पुलुसूद नो बादलत चुसिद लिज़्यावलाई बनै चोइस क्रिद अइ दोक्यो, “मानुवाताव नबाली मींःद सिम्न्या बेला ओतावए नराँकासी हाइद एन्के।” 16 नकिन नो बादलत चुसिद लिज़्यावए मानुवा तर्त ओराँकासी चलैद मानुवाताव बाली एन्क्यो।

17 नकिन फरी छुत तोबो चाकर्या स्वर्गताव ध्यान झिमनी पुलुसूके। नोए उकुइत मनी तोबो बनै छाव राँकासी उलिज़्याव। 18 नकिन फरी ब मेंःए मुल्का डैताव तोबो चाकर्या थाननी हुद नो उकुइताव छाव राँकासी ल्यो चाकर्यालाई बनै चोइस क्रिद अइ दोक्यो, “मानुवाताव जोम्परसैर मींःद लेर। छाव नराँकासी चलैद ओजोम्पा भरी सतेद यासिम्के,” है ओदोक ते, 19 नो चाकर्याए मानुवात ओराँकासी चलैद जोम्पा भरी सतेद सिम्द परमेस्वरए उरिसलाव पीन्या ओकोलोल याख्याक्यो। 20 नो जोम्परसैर सहरकिन पाखाड यापीक झी बनै पुलुसूद सोंसय किलोमितर भरिवाल घोरा गदैन्यावाकाव भल बाके।

## 15

याकुइत नुल्पा नुल्मा ल्यो चाकर्यार

1 फरी डाभाल्सिक नमत तोबो बनै अचम्बलाव सरेस डारंःके। याकुइत नुल्पा नुल्मा ल्यो सात जना चाकर्यार डारारंःके। आवर

ज्ज प्राइरानी छींताव नुल्पा नुल्मार, परमेस्वरए उरिस नत ज्ज खेमन्या ले।

2नकिन तोबो मेंःस बरेःसिउ धर्पन स्यासो बनै घ्योःव समुन्द्र मिताव डारैःके। नोए ओतर्त परमेस्वरए नोरालाई ओरायो सारङ्गर याकुइत ल्योर कुधु ज्ज च्याँःसिद यालिज्याव ब डारारैःके। नो च्याँःसिद लिज्यावर नो डादाडाव राछ्यास सोनो नोए उसुरूप जैसिउ अडग्याए ओछाप मारैवर, ओलकिन झेंःस्या तावर ज्ज।

3 नोराए परमेस्वरए ओनोकोर मोसा सोनो परमेस्वरए ओपाथाए ओभजन अइ लिद यागैज्याव,

“अ परमप्रभु,

बनै नसक्ती ल्यो गेपरमेस्वर,

नँ नयेन भरी बनै घ्योःव सोनो अचम्बलाव ज्ज लिज्या।

नँ प्राइँ जातलावराए याराजा,

नदोज्याव भरी ब बनै सतलाव साचो वाज्ज लिज्या।

4है जैद अ प्रभु, नँलाई रँःद माछेःन्या सु ची उलिज्याव?

नमिन सघ्योःद मायान्या ब सु ची उलिज्याव?

नँ वाज्ज सतलाव छैव नलिज्या।

प्राइँ जातलाव मिरँ नखँत फुलुप्सिद धो दान्या लेर।

न्यायस नदोज्याव येन भरी छर्लङ्ग ज्ज रँःद ले।”

5आव भरी ओतावत फरी ब डाभाल्सिक स्वर्गताव ध्यान झिम फैसिद परमेस्वर उलिज्याव प्राइरानी चोखो पो डारैःके। 6 हाःत ज्ज नो डादाडाव याकुइत नुल्पा नुल्मा ल्यो सात जना चाकर्यार ध्यान झिमनी पुलुसहुकेर। नोर बनै तक तकौ क्वा जासिउर, याछातीत सुने पाता पोःसिउर यालिज्याव। 7 नकिन नो चारता जनतु स्यासोरानी तोबोए नो सात जना चाकर्यारालाई एकतार जीदो



ज़ लिज़्याव परमेस्वरए उरिस सब्याल्सिउ सात गोता सुने खुरी याएक्यो। 8 हाःत ज़ नो स्वर्गताव ध्यान झिम भरिल परमेस्वरए ओज़्गै स्रोनो ओसक्तीनिकाव मिकुइए सब्याल्क्यो। नो सात जना चाकर्याराए याकुइताव नुल्पा नुल्मा ओमाखेमा पै नो ध्यान झिमल सु ज़ मापसिधुकेर।

## 16

परमेस्वरए उरिसलाव सात गोता खुरी

1नो सात जना चाकर्यारालाई ध्यान झिमनी तोबो गाए अइ ओरादोज़्याव डाथैके, “जे बाचिकेदा, नो परमेस्वरए उरिसलाव सात गोता खुरीर मानुवात याराथुचिके,” है ओरादोक ते, 2 उस०कतावए उखुरी मानुवात उथुव प्राइँना नो राछचासए ओछाप रैवर स्रोनो नोए उसुरूप जैसिउ अङ्ग्यालाई धो दाज़्याव मिँ भरिराए याक्याँत धो सहिउ युँ माजामो घाइर ताकेर।

3नकिन फरी होए उछींताव चाकर्याए उखुरी समुन्द्र तर्त उथुव प्राइँना सिउ मिँए उझी स्यासो ताद समुन्द्रलाव ताज़्याव भरी ओपोःस ज़ सिकेर।

4नकिन फरी नोनी निछींताव चाकर्याए उखुरी रीमुल जीदा, भै जीदा उथुक नलाव री भरी झी ज़ ताके। 5 नै ओताव प्राइँना रीराए डैताव चाकर्याए अइ लिद ओपाँज़्याव डाथैके,

“अ सतलाव छैव प्रभु, डादाकिन ब लिज़्याव, एकमन्या ब लिज़्याव,

आव नरायो सजा न्यायस ज़ नदोके।

6आव सजा दैवराए भाःकिन ज़ नअगमबक्तारालाई, छैव नमीरालाई याझी सोभोद्याद सैःव ज़ यारानैज़्याव।

अब ते नोरालाई झी ज़ नरासवैके।

नोर नो दैन्याकावर ज़ याल्यो।”

7हा:त ज़ नो थाननी मनी तोबो गा अइ लिद हुके,  
 “हैज़ परमप्रभु बनै नसक्ती ल्यो गेपरमेस्वर,  
 आव नफालो भरी साचो न्यायस ज़ नफाल्के।”

8नकिन नो सोम्लोराए याछींताव चाकर्याए उखुरी निमी तर्त  
 उथुक घामए मिंरालाई हिपून्या जैद ओरायोए, 9 नोरालाई ग्रेप ग्रेप  
 रावए यासघाक्यो। हितावत मनी नोराए यायुं माफकैर, परमेस्वरए  
 ओमान ब नैद माएकेर, इन नो नुल्पा नुल्मा जैन्या ओहक लिज्याव  
 परमेस्वरलाई उमिन हाइद थलो ज़ नैकेर।

10नकिन नो चारताराए याछींताव चाकर्याए उखुरी नो राछचासए  
 उसिंहासनत उथुक ओराज्या भरी चुम चुमो ज़ ताके। नलाव  
 लिज्याव भरिराए यादुखए यासे कर्याप कैकेर। 11 नोराए मनी  
 यायुंलाई माफकैकेर, बुरू यायेनलाई ब मारासूद नो याघाइरानी  
 यादैव दुखए इन स्वर्गताव परमेस्वरलाई थलो ज़ नैकेर।

12नकिन नो पाँच जनाराए याछींताव चाकर्याए उखुरी घ्यो:व  
 यूफ्रेतिस भैल उथुक नलाव री भरी ओपो:स ज़ सांके। नो बगरल  
 पुर्बनी हरिज्याव राजाराए यायेम ब तयार ताके। 13 हा:त ज़ नो  
 अजिङ्गरए ओया:नी तोबो, राछचासए ओया:नी तोबो, नोए ओपाँ  
 सथैज्याव ओनैए ओया:नी तोबो, नोर सोम्लोए याया:नी ज़ बोकोरो  
 स्यासो माचाव पुरूसर पुलुस्केर। 14 नोर अचम्बलाव सरेसर  
 सतैज्याव माचाव पुरूसर ज़। नोर आव मानुवाताव राजा भरिरालाई  
 बनै ओसक्ती ल्यो परमेस्वरए जैद ओरायो खेमून्या छ्यामकाव  
 लरैए उज्जनी दुपनाज्यावर ज़।

15“है जैद जे सैसिद लिच्यो। डा कुना हुज्याव मिं मिताव सुए  
 ज़ यामासैद डाहुरिज्या। जो सैसिद झा:सिद लिज्या, हो ओक्वार  
 सामा दाद औनैकिन नाडग्या ताद लाज मोर्नो माताद धन्याकाव  
 ज़ लिज्या।”

16नकिन नो बोकरो स्यासो पुरूसराए मानुवाताव राजा भरिरालाई हिबू खामनी तोबो आर-मागेदोन यादोज्याव पोल यारादुपूकेर।

17नकिन नो सात जना चाकर्यारानी प्राइरानी छींताव चाकर्याए उखुरी बतासत उथुक स्वर्गताव ध्यान झिमलाव सिंहासनतिन तोबो गा, “अब ते खेम्के,” है लिद हुके। 18 हाःत ज़ म्याल्याकनी मिलिक ताद नमर गर्जिद नामर ब थोनोःसिके। नो भोंचालो बनै घ्योःव ओतावए आव मानुवात मिँर यातावकिन खर्क ज़ नाःल्दिउ ओमाहुताव। 19 नो भोंचालोनी आव मानुवाताव बनै उमिन थासो सहर सोंभा ताद प्राइँ राज्यालाव सहरर धलिकेर। है जैद नो उमिन थासो बेबिलोन सहरलाई उजुँ यान्या मामेंःद परमेस्वरए उरिस सब्याल्सिउ खुरीनी दाखमद्य सवैक्यो। 20 समुन्द्र खालाव तापु भरी ब ओपोःस ज़ गदिकेर, हॉर ब आदा बाकेर लिन्या ज़ माताके। 21 तिसरैर ब बनै घ्योःव घ्योःव तुगुर दँकावर नमतिन मिँराए यातर्त तेकेर। नो तिसरैनिकाव नुल बनै माचाव ओतावए मिँराए परमेस्वरए उमिन हाइद बनै ज़ थल्केर।

## 17

### बेबिलोन मेंमा सोनो राछ्यास

1हाःत ज़ नो याकुइत खुरी ल्यो सात जना चाकर्यारानी तोबोए डालाई है दाँक्यो, “आत हुन्के, डा नँलाई रीराए तर्त चुसिद लिज्याव पातर्नी मेंमाए ओदैरिज्याव सजा सतैद डाईरिज्या। 2 नोस आव मानुवाताव राजा भरिराए पातर्या जैसिद, याधूँलाव मिँ भरिए ब नोस निताव यादोव येनए मँःव मितावर ताद बनै महकिकेर।”

3हाःत ज़ परमेस्वरए उपुरूसए डालाई झजलकैद नो चाकर्याए डालाई तोबो बनल ओलाँनाव मिताव ताके। नड नो मेंमालाई घ्यामो राछ्यासए ओतर्त चुसिद उलिज्याव डारँःके। नो राछ्यासए ओडै सात गोता, उरँः दस गोता उलिज्याव। ओक्याँ भरी परमेस्वरकिन

स०द युँ माजामो मिनर सर्सिउ उलिज्याव। 4 नो मेंमा फरी घ्यामो सोनो पीव क्वा क्वाइसिउ उलिज्याव। ओक्याँ भरी सुन चाँदी, हिरामुतीए झलैसिउ उलिज्याव। उकुइत फरी सुने खुरील ओदोव युँ माजामो येनर, ओदोव असतर नल सब्याल्सिउ उलिज्याव। 5 नोए ओचाँदीत तोबो बिन्जा बिन मिताव मिन सर्सिउ उलिज्याव। नो सर्सिउ आव ज़, “माहान बेबिलोन, मानुवाताव पातर्नीर सोनो युँ माजामो पाँराए याआमा ज़।” 6 नो मेंमालाई परमेस्वरए छैव उमीराए याझी सोनो येसुए ओसाची याज्यावराए याझीए मँ:द उलिज्याव डारँ:के। है जैद नोलाई रँ:द अचम्ब ज़ डाताके।

7 हा:त ज़ नो चाकर्याए डालाई, “नँ काराव अचम्ब ताद नलिज्याव? नो मेंमाए ओअर्थ सोनो नोलाई घुर्द नैज्याव ओडै सात गोता उरँ: दस गोता ल्यो राछ्यासए ओअर्थ ब पलासुद डारँरिज्या। 8 नो नरँ:व राछ्यास डादा ते ओल्यो, आख ते माले। हैदी ब नो सुन्द मुन्दौ भल्खादानी तखेप पुलुसुद हा:किन नासदा ज़ बान्या ले। है जैद आव नाम नम ओमातादकिनकाव अजम्बरी जुनील बान्या पोस्तोकोल यामिन माल्यो भरी नो तखेप सिद जनो राछ्यासलाई रँ:द अचम्ब ज़ तान्या लेर।

9 “आवए ओअर्थ भरी यागहक ल्योराए उतीरक। नो राछ्यासए सात गोता ओडैए ओअर्थ नो मेंमा चुसिद उलिज्याव सात गोता पोक्यार ज़। 10 नोर सात राजार ज़। नो सात राजारानी पाँच राजार खदम ताधुकेर, तोबो आज्यालकाव लिज्याव ज़, तोबो आ:पै माहुताए। नो उहुवत जाँवा पै वाज़ लिरिज्या। 11 नो डादा ल्यो छीनी सिउ राछ्यास मनी नो सात राजारासकावनी तोबो ओल्यो। नो फरी उहुवत नो सात राजात चासिद आथौँ राजा ब तारिज्या। हा:त ज़ नो ब नास तारिज्या।

12“फरी नो नरँःव राछचासए दस गोता उरँःर दस राजार ज़। नोराए आःपै याराज्या मादैतार। हितावत ब नोर नो राछचासस तघन्ताए उजूनी राज्या चलैन्या हक दैन्या लेर। 13 नोर प्राइँए यारुँ तोबो युँ ज़ लिज्या। है जैद नोराए यासक्तीर याहकर प्राइँए नो राछचासए उकुइत ज़ सूँपिन्या लेर। 14 नोराए परमेस्वरए ओपाथास लरँ दान्या लेर। निताव यादोवत नो पाथा प्रभुराए याप्रभु, राजाराए याराजा ओल ज़ ओतावए नोरालाई हारैन्या ले। ओलसकाव लिज्याव भरी ओल ओराछाँतिउर, ओराखुलोर सोनो ओसतत लिज्यावर ज़।”

15नकिन नो चाकर्याए फरी ब है दाँक्यो, “नो पातर्नी मेंमा चुसिद उलिज्याव नरँःव रीर प्राइँ राज्यालावर, प्राइँ जातलावर, प्राइँ खामनी पाँज्याव माहोल्या मिँर ज़। 16 नो नरँःव दस गोता राजार फरी नो राछचासस खैद नो पातर्नी मेंमालाई सोद भोरोगेसिद नाङ्ग्या पात्त्या जैद ओसूयाकरीर कैद मेंःल ख्यान्या लेर। 17 है जैद परमेस्वरए ओपाँ भरी ओमायोःवा पै ओल उयुँलाव मिताव येन दाव परीन्याए जूनी नो दस राजारालाई तयुँ ज़ जैद्याद याहक भरी नो राछचासलाई यान्या याजैक्यो। 18 नो नरँःव पातर्नी मेंमा फरी मानुवाताव राजा भरिराए याडैताव बनै उमिन थासो सहर ज़।”

## 18

### बेबिलोन सहरए उमिन ज़ माके

1आव भरी ओतावत फरी स्वर्गतिन छुत तोबो चाकर्या उहुज्याव डारँःके। नोए ओहक बनै घेप्पा उलिज्याव, ओजगैए आव मानुवालाई ज़गैव ज़ जैक्यो। 2 नो बनै चोइस अइ लिद किके, “माहान बेबिलोन उमिन ज़ माके, उमिन ज़ माके। नोए ओपो भरी इयार, माछैव पुरूसर सोनो युँ माजामो बाजार लिन्या पो ज़ ताके। 3 प्राइँ राज्यालाव मिँर नोए ओदोज्याव युँ माजामो येनत फसङ्गिद मँःव मिताव ताकेर। मानुवाताव राजा भरी ब नोस ज़ पातर्या

जैसिकेर। मानुवाताव बेपारीरास नो मेंमाए उयुँ मानैधुद उरँ:व भरी लँ:द ओराएज्यावए नोर बनै धनी ताकेर।”

4हा:त ज़ स्वर्गत फरी ब छुत तोबो गा अइ लिद ओपाँज्याव डाथैके, “अ डामिनताव डामीर, नो मेंमाए ल्योनी पुलुसूद ओपापत लन्था मादाद तँड लिच्यो, मानी नोए ओक्याँताव सजार जे जेक्याँत मनी हुन्या ले। 5 नोए ओपापर नम सुइँ:त पै बोर्सिनाद लेर। नो भरी परमेस्वरए मामें:व। 6 है जैद प्रभु, नोलाई ओदोव मितावनी ज़ ओसजा एके, ओदोव येनकिन दोबोर ज़ एयो। मिँरालाई उखुरीनी ओरासवैव भरी ब ओललाई दोबोर ज़ सवैयो। 7 ओल खा सघ्यो:सिद थाँतस ओल्यो, हा:ज़ ओबकम मिलैद्याद धो खासिद लिन्या जैयो। नोए ड़ादा उयुँल उयुँल है लिज्या, ‘डा रानी ज़ डालिज्या। राँदी मेंमा मिताव डामाले, सोगो ब खर्क ज़ दान्या डामाले।’ 8 है जैद नितावए ओक्याँत तछात ज़ नुल्पा नुल्मार हुद, नोलाई बेथार अनिकालर ताद उयुँर स्यासे तेद में:ए ओज्यास तान्या ले, काराव ल्यो ताकिन नोलाई फाल्ज्याव परमेस्वर बनै ओसक्ती ल्यो लिज्या।

9“है जैद आव मानुवाताव राजार, सोनो नो मेंमास थाँतस लिद युँ माजामो येन दोवराए नो मेंमालाई याख्याव में:ए उमिकुइ नमदा ज़ ओबाज्याव रँ:द नोराए यायुँर पा:वा पा:वा घर्न्या लेर। 10 नोए उदुखलाई मारँ:धुद याछ्याचेए तादाड ज़ च्याँ:सिद अइ लिन्या लेर,

‘हाइ! हाइ! ना:ल्दिउ सहर,  
बनै नसक्ती ल्यो बेबिलोन,  
तघन्तात ज़ नसजा हुके।’

18:3 18:3 यसै २३:१७; यर ५१:७      18:4 18:4 यसै ४८:२०; यर ५०:८; ५१:६,४५  
18:5 18:5 उत १८:२०-२१; यर ५१:९      18:6 18:6 भज १३७:८; यर ५०:२९      18:8  
18:7-8 यसै ४७:७-९      18:10 18:9-10 इज २६:१६-१७

11“मानुवाताव बेपारीर मनी यासमानर लँःजूयावर खदम ज़ यातावए पाँकी पाँ घर्न्या लेर। 12 नो बेपारीराए यासमानर आवर ज़ — सुन चाँदीर, हिरामुतीर, नप नबो कपासे क्वार, रेसम क्वार, घ्यामो सोनो घ्यामर्यासो क्वार, चाव सी डरो सीं, हातीए ओधारार, प्राईं किसिमलाव ओएः ल्यो सीं जार, लुँए जार, पितले जार, झुँए जार, 13 दालचिनीर, मसलार, धुपर, अतरर, ओएः ल्यो मासर, दाखमघर, मनमर, तामर, हारर, बेधार, घोरार, घोराराए यासेलूजूयाव गदीर, बाँदार सोनो मिँर। 14 है जैद नो बेपारीर, ‘अब ते नयुँए ओपैँजूयाव भरी उमिन ज़ माके।

नखिमूजूयाव मिताव जिली मिलीर, चाचा नानार कातानी ची नदैरिजूयाव?’

15“है जैद ननी धनी ताव बेपारीर नो मेंमाए ओदैव दुखर रँःद नोर याछ्याचेए तादाड ज़ च्याँःसिद बनै ज़ लँसिद अइ लिन्या लेर,

16‘हाइ! हाइ! नाःल्दिउ सहर बेबिलोन मेंमा नप नबो घ्यामो कपासे क्वार क्वाइसिद लिजूयाव, हिरामुती सुन चाँदीए झलैसिद लिजूयाव,

17कै जैद तघन्तात ज़ नाःकाव नधन सम्पती चुयाप ओताव?’

“नकिन फरी री जहाज चलैजूयाव कप्तानर, होराए याधूँलावर सोनो री जहाजत आदा होदा लिद बेपार दाद डासिजूयावर तादाड च्याँःसिद, 18 नो सहरनिकाव चाँःद पुलुसूजूयाव मिकुइ नमदा ज़ ओबाजूयाव रँःद नोर यासोगोए अइ लिद किकेर,

‘हाइ! हाइ! आव अचम्बलाव नाःल्दिउ सहर मिताव उपुर काड्डु ची उलिजूयाव?’

है लिद, 19 याडैनी धुली राल्सिद बनै पाँकी पाँ लँसिद है लिकेर, ‘हाइ! हाइ! नाःल्दिउ सहर ओल्यो।

नो सहरनी ज़ री जहाजत बाज़्याव भरी ब प्राइँ धनी ताद याल्यो।  
कै जैद तघन्तात ज़ चुयाप ओताव?’

है लिकेर।

20‘खाली जे स्वर्गत लिज़्यावर, परमेस्वरए छैंव उमीर, ओसाचीर  
सोनो अगमबक्तर ते,  
परमेस्वरए नो मेंमाए ओक्याँताव ओसोभोव रिसलाई रैं:द रेंचिके।  
काराव ल्यो ताकिन नो मेंमाए जेउपत ओदोव अन्याय ओसजा  
परमेस्वरए याद नैव।’ ”

21हा:त ज़ तोबो बनै ओर्सा ल्यो चाकर्याए तोबो बनै घ्यो:व राँथै  
लुँ मिताव छींद अइ लिद समुन्द्रल ख्याक्यो,  
“नो घेप्पा बेबिलोन सहर मनी इतावनी ज़ घेप्पा रिसस ख्यासिद  
आदा बाके लिन्या ज़ तान्या माले।

22हा:किन नल सारङ्गए गा ब थासून्या माले,

बाँसुलीए गा ब थासून्या माले,

भोंकरए गा ब थासून्या माले,

काता गाजा बाजाए गा ज़ माथासूद साइँसुइँ ज़ तान्या ले।

येन दाज़्यावराए यायेन ब रैं:न्या माले,

तोबो राँथैए गा ब थासून्या माले।

23बत्तीए ओपलाँ ब खर्क ज़ रैं:न्या माले,

ज्यार रेर दाद यारेंज्याव गा ब थासून्या माले।

नो सहरलाव बेपारीर आव मानुवाताव प्राइँरानी घेप्पार याल्यो।

प्राइँ राज्यालाव मिँर नोए ओमोहोननी ज़ झुकिकेर।

24नो सहरल ज़ फरी अगमबक्तर, छैंव उमीर सोनो मानुवात  
यारासै:व भरिराए याझी ब नल ज़ रैं:के।”

---

18:19 18:19 इज २७:३०-३४ 18:20 18:20 ब्य ३२:४३; यर ५१:४८ 18:21  
18:21 यर ५१:६३-६४; इज २६:२१ 18:22 18:22 इज २६:१३; यसै २४:८ 18:23  
18:22-23 यर ७:३४; २५:१० 18:24 18:24 यर ५१:४९



## 19

1आव भरी ओतावत स्वर्गत बनै घ्योःव माहोल्याराए गा अइ यालिज्याव डाथैके,

“हालेलुया! प्राइँनिकाव मानर, प्राइँनिकाव सक्तीर गेपरमेस्वरए उमीर ज़।

गेलाई बाँचैन्या ब उकुइत ज़ लिज्या।

2नोए ओफाल्ज्याव भरी ब साचो न्यायस ज़ फाल्ज्याव।

नो मानुवाताव मिँरालाई युँ माजामो ओयेननी बलेज्याव पातर्नी मेंमालाई ब थिक सजा ज़ याद नैव।

परमेस्वरए ओसेवा दोज्याव यारासैःव भरिराए याङ्गी नो मेंमाए ओक्याँत ज़ लागिस्द,

याखिस ब नत ज़ सयोद नैर।”

3हाःत ज़ फरी ब नो माहोल्याराए,

“हालेलुया, नो पातर्नी मेंमाए ओसजानिकाव मिकुइ नमदा ओबाज्याव खर्क ज़ खेम्न्या माले।”

4फरी नो स्वर्गताव राजाए ओडाकाव चौबीस जना सेरर सोनो चारता जन्तु स्यासोर नो सिंहासनत चुसिद लिज्याव परमेस्वरए ओडाक फुलुप्सिद,

“आमेन, हालेलुया,”

लिद ओसेवा दोकेर।

पाथाए उबिह्यालाव भत्तयार

5हाःत ज़ फरी नो सिंहासनतिन तोबो गा अइ लिद हुके,

“अ परमेस्वरए उमिनताव घेप्पा जिम्ज़ार, ओयेन दाज्यावर, ओमान नैद्याज्यावर,

परमेस्वरए उमिनर सघ्योःदिचिके।”

6नकिन फरी ब बनै घेप्पा रीए ओर्गा मिताव, सोनो नम गर्जिज्याव

मिताव बनै घ्योःव माहोल्याराए यागा अइ लिद यापाँज्याव मिताव डाथैके,

“हालेलुया, परमप्रभु,

बनै ओसत्की ल्यो गेपरमेस्वरए अब ते ओराज्या चलैन्यात थूसिके।

7है जैद गे रेंद गेयूर होलाँ जैद,

उमिनर सद्योःद्याव ताके।

अब ते परमेस्वरए ओपाथाए उबिह्या तान्या बेला ब हुद ले।

ओब्याहोल्यानी मनी बिह्याए जूनी झाःसिद ले।

8नोलाई बनै माँत्या तक तकौ चोखो नप नबो कपासे क्वार क्वाइसिन्या याद यानैज्याव।”

नो क्वाए ओअर्थ परमेस्वरए छैव उमीराए ओल ओसतत लिद यादोव धर्मलाव येनर ज़।

9हाःत ज़ नो चाकर्याए डालाई है दाँक्यो, “आव ब सर्के, नो पाथाए उबिह्यालाव भतयारल खुल्सिउर असिक दैवर ज़।” नकिन फरी ब नोए,

“आव भरी परमेस्वरनी हुव थंरिउ पाँ ज़ लिज्या।”<sup>10</sup> हाःत ज़ डा नो चाकर्याए उखँत फुलुप्सिद धो डादोक, नोए,

“नँ डालाई धो दान्या माःक, डा मनी नँ नदोज्याव मिताव सोनो येसुए ओपाँत साची याज्याव ननैराए यादोज्याव मिताव परमेस्वरए ओसेवा दाज्याव ची।

है जैद नँ ओल परमेस्वरलाई ज़ धो दोके। गे येसुए ओपाँत साची याज्याव भरी परमेस्वरए उपरुसनी हुव थंरिउ पाँ याज्यावर गेलिज्या।”

राजाराए याराजा झेंःस्या ताज्या

11हाःत ज़ फरी ब डाभाल्सिक नम फैसिउ डारँःके। नत तोबो पालो घोरालाई चेपूद नैज्यावलाई ब डारँःके। नोए उमिन

‘थंरिउ सतस दोज्याव’ उलिज्याव। नोए न्यायस ज़ मिँरालाई

ओराफाल्ज्याव सोनो लरें ओदोऽयाव। 12 नोए उमी मेंःए मुल्का मिताव उलिऽयाव, ओडैत मुकुतर कुधु ज जासिसिउ उलिऽयाव। नोए ओक्याँत तोबो मिन सर्सिउ उलिऽयाव। नो मिन ओल वाज्ज ओसैँज्याव, उपुर्कावराए सुए ज्ज यामासैँज्याव। 13 ओक्याँताव ओक्वाइसिऽयाव ओक्वा भरी झील छिमिसिउ उलिऽयाव। नोए उमिन “परमेस्वरए ओपाँ ज्ज” नैसिउ उलिऽयाव।

14 नोए उछींत स्वर्गताव परमेस्वरए ओफौजी भरी बनै माँत्या पाल पालो चोखो कपासे क्वार क्वाइसिसिउर, पालो घोरार चेपूद याहुज्याव। 15 नोए आव मानुवाताव राज्यारालाई फूडँन्याए जूँनी ओयाःत बनै छाव तरवाली पुलुसूद उलिऽयाव। नोरालाई चलैन्त्या फरी उकुइत झँए झुइ ब रैद नैव। नोए ओराफूडँव भरी बनै ओसक्ती ल्यो परमेस्वरए नोरालाई उरिसलाव कोलोल झाःद पीन्त्या ले। 16 नोए ओक्वात सोनो ओर्यात इताव मिन सर्सिउ उलिऽयाव, “आव प्रभुराए याप्रभु ज्ज, राजारार याराजा ज्ज।”

मानुवाताव माचाव भरी खदम तान्या ले

17 हाःत ज्ज फरी निमीत तोबो चाकर्या च्याँःसिद उलिऽयाव डारैःके। नो बनै चोइस अइ लिद उक्लिऽयाव, “अ नमताव भुर्ज्याव बाजा भरी, परमेस्वरए जैद ओयाचिउ भत्यारल दुप्सिहुचिके।

18 नो भत्यारल जे आव मानुवाताव राजारार यास्यार, यासेनापतीर सोनो याघेपुपाराए यास्यार, याघोरार सोनो नो घोरा चेपूज्यावराए यास्यार, बाँदा माबाँदा, घेपुपा ज्जिम्जार, प्राडँए यास्यार कैव दैन्या जेले।”

19 नकिन नो उसंकताव राछ्यास, मानुवाताव राजार, याफौजीरास दुप्सिद यालिऽयाव डारैःके। नोर नो पालो घोरा चेपूद नैज्याव, ओल परमेस्वरए ओफौजीरास लरें दाना हुद यालिऽयाव। 20 हाःत

ज़ नो राछ्यास नक ज़ क्योःसिके। ओल ओसक्ती दैद अचम्बलाव येनर दाद ओपाँ सथैज़्याव ओनै ब क्योःसिके। नो ओनै नो ड़ादाडाव मानुवाताव मिँरालाई राछ्यासए ओछाप झाःद्याद राछ्यासए उसुरूप जैसिउ अडग्ग्यालाई सेवा दाव परींद मिँरालाई झुकैज़्याव ज़। है जैद परमेस्वरए नोनी नेब्लोलाई ज़ गन्धकनी चाँःज़्याव मेंःल जीदो ज़ निख्याक्यो। <sup>21</sup> उपुर्काव नीस हुव याफौजीर ते नो पालो घोरा चेप्सिउए ओयाःताव तरवालीनी ज़ सिकेर। नोराए यास्यार कैद नमताव बाज़ा भरी ब वाँःकेर।

## 20

सैतान हजार बर्स पै किद पलत्तैसिउ

<sup>1</sup>हाःत ज़ फरी तोबो चाकर्या स्वर्गतिन उहुज़्याव डारँःके। नोए उकुइत नो सुन्द मुन्दौ भल्खादालाव साँचा ब उलिज़्याव, बनै घेप्पा झँए साँगल ब उलिज़्याव। <sup>2</sup> नोए नो ड़ादाडाव अजिङ्गरलाई क्योःद तहजार बर्स पै किद नैक्यो। नो अजिङ्गर भाःकाव झुकैज़्याव घुल, दियाबलस यादोःज़्याव सैतान ज़। <sup>3</sup> है जैद नोलाई भल्खादाल ख्याद नो भल्खादालाई कःद तालकुची ब झाःक्यो। हाःकिन नो हजार बर्स ओमायोःवा पै सैतानए मानुवाताव मिँरालाई सुलाई ज़ झुकैव दैन्या माले। नो ओयोःवत वाज़ छ्यावाए जूनी तखेप रास्सिन्या ले।

<sup>4</sup>हाःत ज़ फरी स्वर्गत सिंहासन मितावर कुधु ज़ डारारँःके। नत चुसिद लिज़्यावरालाई फालन्त्या हक यासिउ उलिज़्याव। फरी ब डाभाल्सिक परमेस्वरए ओपाँत सोनो येसुए ओसाची यान्यात याडै च्मद यारासैःवराए यापूरूसर ब डारारँःके। नोर नो राछ्यास सोनो राछ्यासए उसुरूप जैसिउ अडग्ग्यानी निसेवा ब दाव माभैःकेर, सोनो याचाँदीत याकुइत राछ्यासए ओछाप ब झाःव माभैःकेर। है जैद नोर सिउनी सैसिद ओल ख्रीसस तहजार बर्स पै राज्या दोकेर।

5 प्राइरानी उस०कताव सिद सैसिउर नोर ज़ तान्या लेर। उपुर्काव सिउ भरिर ते नो तहजार बर्स ओयोःवत वाज़ तखेप सैसिन्या लेर। 6 है जैद नो उस०कताव पालाकाव सिउनी सैसिज़्यावर बनै असिक दैवर परमेस्वरए उयुंलाव मिताव छैवर लिज़्यार। नोर नेखेप सिन्या मालेर। नोर परमेस्वर सोनो ख्रीसनी निसेवा दान्यार ताद ओल ख्रीसस तहजार बर्स भरी राज्या चलैन्या लेर।

सैतान खर्क ज़ माजिपूतिन्या मेंःल ख्यासिन्या ले

7 नो हजार बर्स ओयोःवत सैतान किसिद उलिज़्यावनी राससिन्या ले। 8 ननी राससिद नोए आव मानुवाताव चार कोन्याडाव राज्यारालाई, अथबा गोग मागोगरालाई\* फसङ्गैद लरै दाना दुपूद यारैरिज़्याव। नोराए याफौजीर समुन्द्रलाव बालुवा स्यासो सुए ज़ मागनिधुन्या तारिज़्यार। 9 नोर आव नामलाव तोबो बनै घ्योःव बाँल हुद परमेस्वरए मया ओदोऱ्याव यरूसलेमल ज़ उमिनतावरालाई याराधिरिहुरिज़्यार। हाःत ज़ स्वर्गतिन मेंःए मुल्का हुद सैतानए ओरारैव फौजीर चुयाप तारिज़्यार। 10 नोरालाई झुकैज़्याव सैतान मनी गन्धकनी चाँःज़्याव मेंःल ख्यासिरिज़्या। नो मेंःल ज़ नो डादाडाव राछ्यास ब उलिज़्याव, नोए उपुरूसनी पाँद झुकैज़्याव ओनै ब नल ज़ उलिज़्याव। नोर सोम्लो खर्क ज़ माजिपूतिन्या मेंःल लाकनी रील गाप गाप तान्या लेर।

मिँ भरी सु सु यायेननी ज़ फाल्सिन्या लेर

11 नकिन फरी डाभाल्सिक तोबो बनै घ्योःव पाल पालो सिंहासनत चुसिद लिज़्यावलाई डारँःके। नोए ओडाकिन नाम ब धोंःके, नम ब धोंःके। खाली नोनी मोसिन्या पो ज़ मादैकिनी। 12 हाःत ज़ सिउ भरी घेपूपा ज़िमज़ार सिंहासन डाक च्याँःसिद यालिज़्याव डारारँःके। नक फैसिउ पोस्तोकोर ब यालिज़्याव। नोरानी तोबो पोस्तोको

\* 20:8 20:8 गोग मागोग है लिसिउए ओअर्थ — परमेस्वरकिन तँदा जैसिज़्याव राज्यार।  
20:8 20:8 इज ७:२; ३८:२,९,१५

ते अजम्बरी जुनीलाव पोस्तोको उलिज्याव। हाःत ज़ नो सिउर नो पोस्तोको भरिल यादोव येन सर्सिउनी ज़ फाल्सिकेर। <sup>13</sup> नो फाल्नुया बेलाए उजूनी ज़ समुन्द्रल सुद सिउर ब पुलुस्केर, खादरल झाःसिउर ब पुलुस्केर, प्राइंडाव सिउ भरी ज़ पुलुस्केर। नोर ओपोःस ज़ सु सु यायेननी ज़ फाल्सिकेर। <sup>14</sup> हाःत ज़ सिनुया सोनो नर्गनी चुयाप जैज्याव मेंःल ज़ ख्यासिकिनी। नो मेंःल ख्यासिनुया ज़ नेखेप सिनुया। <sup>15</sup> है जैद जोए उमिन नो अजम्बरी जुनीलाव पोस्तोकोल ओमासर्सिकिन नो मेंःल ज़ ख्यासिउ परिरिज्या।

## 21

परमेस्वरए ओबास मिँरास तान्या ले

<sup>1</sup>हाःत ज़ फरी डाभाल्सिक साःरो नाम नम डारँःके। डादाडाव नाम नम समुन्द्रस ज़ खेम्के। <sup>2</sup> नकिन तोबो भर रे दाव मेंमा ओरेए जूनी झलैसिउ मिताव छैव सहर, साःरो यरूसलेम परमेस्वरए ल्योनी स्वर्गतिन उझरिहुज्याव डारँःके। <sup>3</sup> हाःत ज़ स्वर्गताव राजाए ल्योनी तोबो गा बनै चोइस अइ उलिज्याव डाथैके, “अबकिन परमेस्वरए ओबास मिँरास तारिज्या। है जैद ओल मिँरास लिद नोरालाई उमीर ज़ जैद ओल यापरमेस्वर ज़ तान्या ले। <sup>4</sup> नोरास ज़ लिद याप्रिलर सीद्याद खर्क ज़ मासिनुया याजैरिज्याव। डादाडाव माचाव भरी नाम नमरास ज़ ओखेमोए अबकिन सोगो दाद घर्न्या ब तान्या माले, काताए दुख ब तान्या माले,” है लिद पाँके।

<sup>5</sup>नकिन नो सिंहासनत चुसिद लिज्यावए है लिके, “अबकिन प्राइँ साःरो ज़ डाजैरिज्या।” फरी ब डालाई है दाँक्यो, “है जैद आव डापाँ ब सर्के, साचो थगरिउ ज़ लिज्या। <sup>6</sup> नो डापाँ आव ज़ — अब ते प्राइँ योके। डा अल्फा सोनो ओमेगा ज़।\* डा प्राइँरानी

20:12 20:11-12 दान ७:९-१० 21:1 21:1 यसै ६५:१७; ६६:२२ 21:2 21:2 यसै ५२:१; ६१:१० 21:3 21:3 इज ३७:२७; लेबी २६:११-१२ 21:4 21:4 यसै २५:८; ३५:१०; ६५:१९ \* 21:6 21:6 दर्सन १:८ चिऊन्या।

डाताव, प्राइरानी छींताव डालिज्या। डापाँत री छोसूज्याव मिँलाई अजम्बरी जुनीलाव री अइज याद उरीछो सैःद्यान्या डाले। <sup>7</sup> है जैद डा डापाँत जो झेंःस्या ताज्या, होए नो असिकर दैरिज्याव। डा होए ओपरमेस्वर ज़ डातारिज्या, नो डाज़ा ज़ तारिज्या। <sup>8</sup> फरी डापाँत छेपोवा ताज्यावर, यारुँ माहुपूज्यावर, युँ माजामो येन दोज्यावर, मिँ सैःज्यावर, पातर्या पातर्नीर, मन्तर तन्तर दाज्यावर, अडग्या पुजा दाज्यावर, धुत पाँज्यावर, नो भरिराए यारुँ गन्धकनी चाँःज्याव मेंःल लिज्या। है जैद नेखेप सिज्यावर आवर ज़।”

साःरो यरूसलेम

<sup>9</sup>हाःत ज़ नो याकुइताव खुरील नुल्पा नुल्मा लिज्याव सात जना चाकर्यारानी तोबोए डाल्योक हुद, “आत हुन्के, डा नँलाई पाथाए ओब्याहोल्यानी सतैद डाईरिज्या,” है दाद, <sup>10</sup> डालाई परमेस्वरए उपुरूसनी झेंःव गोंत लाँद छैँव यरूसलेम सहर स्वर्गतिन उझरिहुज्याव सतैद्याँक्यो। <sup>11</sup> नो सहरत परमेस्वरए ओज़गै उलिज्याव। नो ज़गै बनै ओएः ल्यो छैँव यूँखार स्यासो झिलिक झिलिक ओताज्याव। <sup>12</sup> नो सहर घवाँगिल बनै झेंःव भार्ना उलिज्याव। नो भार्नात बाह गोता यामर यालिज्याव। नलाव पाल्यार बाह जना चाकर्यार यालिज्याव। तोबो तोबो यामत इस्राएली बाह थरराए यामिनर सर्सिउ उलिज्याव। <sup>13</sup> नो यामर पुर्ब तंदा सोम्लो, पछ्युँ तंदा सोम्लो, उत्तर तंदा सोम्लो, दखिन तंदा सोम्लो यालिज्याव। <sup>14</sup> नो सहरए ओभार्ना अदैज्याव गजलाव लुँर ब बाह गोता यालिज्याव। नत तोबो तोबो लुँत पाथाए बाह जना ओसाचीराए यामिन सर्सिउ उलिज्याव।

<sup>15</sup>नकिन नो डास पाँज्याव चाकर्याए नो सहरलाई ओयामर

ओभार्नारास ज़ गोइँन्याए जूँनी उकुइत सुने ताङ्गा तोबो रैद ओनैजूयाव। 16 नो सहरलाई ओगोइँक ओख्यो, ओराँ प्राइँदा ज़ सम सम ताद चार पात्या ताके। नो ताङ्गाए ओगोइँनी ओख्यो ब नेहजार चार सय किलोमितर, ओराँ सोनो ओइँ ब हाःज ताके। 17 नो सहरलाव भार्नाए ओपाता ओगोइँक नो मनी मिँए ओगोइँनी तादी ब, चाकर्याए ओगोइँनी तादी ब, पैसथी मितर ताके। 18 नो भार्नाए उलुँर बनै चाव घ्यामो लुँर यालिजूयाव। सहर भरी ते बनै चाव सुन स्यासो छैं छैंव यूँखार स्यासो उलिजूयाव। 19 नो गजलाव झाःसिउ लुँ भरी बनै याएः ल्यो चाव चावर वाज यालिजूयाव। उसकताव लुँए उमिन स्फतीक ताके। हुकिनकाव लुँ नीर, हुकिनकाव लाल, हुकिनकाव पनना, 20 हुकिनकाव गोमेद, हुकिनकाव सारदियस, हुकिनकाव पित्मनी, हुकिनकाव पिरोजा, हुकिनकाव पुस्पराज, हुकिनकाव लसुने, हुकिनकाव धुमूरकान्त, हुकिनकाव मार्तीस। 21 नो बाहू गोता ग्राम भरी मुतीनी जैसिउ उलिजूयाव। तोबो तोबो ग्राम तोबो तोबो मुतीए ज़ जैसिउ उलिजूयाव। सहरलाव दोहार फरी छैंव सिसा मिताव बनै चाव सुन लैसिउ उलिजूयाव।

22 नो सहर भरिल ते ध्यान झिम ते काङ्क ज़ डामारँके। नलाव ध्यान झिम ते परमप्रभु बनै ओसक्ती ल्यो परमेस्वर सोनो पाथानी ज़ ची निल्यो। 23 नो सहरलाई पलाँव जैन्या निमीए ओचाहित ब ओमालिजूयाव, स्यावैए ओचाहित ब ओमालिजूयाव। नो सहरलाई पलाँव जैजूयाव परमेस्वरए ओज्गै ज़, सहरलाव बत्ती फरी पाथा ज़। 24 हाः बेलाक प्राइँ राज्यालाव मिँर नो ज़गैत ज़ आदा होदा लिन्या लेर। मानुवाताव राजा भरिराए ब यासकाव लिजूयाव चाव चाव भरी ब नल ज़ रैन्या लेर। 25 नो सहरल फरी री खर्क ज़ मातान्या, ला वाज ओतावए नलाव ग्रामर ब खर्क ज़ गल्सिन्या



मालेर। 26 है जैद प्राईं राज्यानिकाव यामिन थासो चाव भरी प्राईं नल ज़ हुन्या लेर। 27 माचाव, युँ माजामो, असत दोज़्यावर ते सु ज़ पसिउ दैन्या मालेर। पाथाए अजम्बरी जुनीलाव ओपोस्तोकोल यामिन सर्सिउर वाज़ पसिन्या लेर।

## 22

1हाःत ज़ नो चाकर्याए डालाई अजम्बरी जुनी याज़्याव बनै छै छैव री हुज़्याव तोबो खोला सतैद्याँक्यो। नो खोला परमेस्वर सोनो पाथानी निल्योनी पुलुस्द, 2 सहर खालाव दोहालाव घ्याँ उहुज़्याव। नो खोला आफी हुफी अजम्बरी जुनी याज़्याव सीर ब यालिज़्याव। नो सीर बाह मास ज़ यासैज़्याव, मैनाए पती छुत छुत सै ज़ ओसैज़्याव। नो सीराए याख्यार फरी प्राईं जातलाव मिँरालाई सगराँन्या वासः ओल्यो। 3 अब ते नल काताए सराप ज़ तान्या माले। परमेस्वर सोनो पाथानी निसिँहासन नल ज़ ताद परमेस्वरए उमीराए नल ज़ ओसेवा दोरिज़्यार। 4 नोराए ओडाः ब रँः धुन्या लेर, उमिन ब याचाँदीत ज़ सर्सिन्या ले। 5 नल री ब खर्क ज़ तान्या माले, नोरालाई बत्ती ब चाहिन्या माले, निमी ब चाहिन्या माले। काराव ल्यो ताकिन ओल माहान परमेस्वरए ज़ ज़गैव जैद याएरिज़्याव। है जैद नोराए ओलस खर्क ज़ माखेम्न्या ओराज़्या ब चलैव ज़ नैन्या लेर।

येसु हतप्त ज़ हुन्या ले

6हाःत ज़ नो चाकर्याए डालाई फरी ब है दाँक्यो, “आव पाँ भरी युँ हुबो साचो पाँ ज़ लिज़्या। नो भाःकिनकाव ओल ओसत्तीर याद पाँव परीज़्याव परमेस्वरए ज़ डा ओचाकर्यालाई मनी नो चाँदो हुन्या पाँर ओसेवा दोज़्याव उमीरालाई सतैद्यान्याए जूनी ज़ परीद

21:26 21:25-26 यसै ६०:११ 21:27 21:27 यसै ५२:१; इज ४४:९ 22:1 22:1  
इज ४७:१; जक १४:८ 22:2 22:2 उत २:९; इज ४७:१२ 22:3 22:3 जक १४:११  
22:5 22:5 यसै ६०:१९; दान ७:१८

नैनाव।”

7येसुए, “हतपूत ज़ डाहुरिज़्या। है जैद आव पोस्तोकोलाव सर्सिउ पाँर धिद दोज़्याव असिक दैव ज़ तारिज़्या,” है लिज़्या।

8आलाव सर्सिउ पाँ भरी थैज़्याव रँ:ज़्याव डा यूहन्ना ज़। आव पाँ भरी डाथैवत डारँ:वत नो डालाई सतैद्याज़्याव चाकर्याए उखँत फुलुप्सिद धो डादोनाक ते, 9 नोए डालाई भै:द मायाद, “नँ डालाई धो दान्या मा:क, डा मनी नँ नदोऱ्याव मिताव, परमेस्वरए उपुरूसनी पाँज़्याव ननैर सोनो आव पोस्तोकोलाव पाँर भै:द दोऱ्यावराए मिताव परमेस्वरए ओसेवा दाज़्याव ची। है जैद बुरू ओल परमेस्वरलाई ज़ धो दोके,” है दाँक्यो।

10नकिन नोए ज़ फरी ब है दाँक्यो, “आव पोस्तोकोलाव सर्सिउ हुन्या पाँर छाप झा:द ताम्पोंयो, काराव ल्यो ताकिन नो योन्या बेला नजिकक ज़ हुद ले। 11 है जैद माचाव येन दाज़्यावराए माचाव यायेन ज़ घदोऱ्यारक, फुरी लिज़्यावर ब फुरी ज़ घलिज़्यारक। हो मिताव ज़ धर्मलाव येन दोऱ्यावराए धर्म ज़ घदोरक, छैव लिज़्यावर ब छैव ज़ घलिरक।” 12 ओल येसुए है लिज़्या, “डा हतपूत ज़ डाहुरिज़्या, प्राइँ मिँरालाई सु सु यायेनए ओजेला यान्या डास लिज़्या। 13 डा अल्फा सोनो ओमेगा ज़, प्राइँरानी ड़ाताव, प्राइँरानी छीँताव, ओजरा सोनो उतुपा ज़।”

14 है जैद याक्वार छेद छैवस लिज़्यावर असिक दैवर ज़। नोरालाई स्वर्गताव परमेस्वरए ओसहरल पसिद अजम्बरी जुनी याज़्याव सीए ओसै ज़्यान्या यासिउ लिज़्या। 15 नो सहरकिन पाखाड ते का: मितावर, मन्तर तन्तर दाज़्यावर, पातर्या पातर्नी जैसिज़्यावर, मिँ सै:ज़्यावर, अडग्या पुजा दाज़्यावर, माचाहिउ येनत यायुँ थू जैद असतलाव येनत लिज़्यावर लिज़्यार।

22:11 22:11 दान १२:१० 22:12 22:12 यसै ४०:१०; ६२:११; भज २८:४; यर १७:१०

22:13 22:13 यसै ४०:६; ४८:१२ 22:14 22:14 उत २:९; ३:२२

16“डा येसुए, जे पो पोडाव मन्दलीराए जूनी आव पाँर सथैन्याए जूनी डाचाकर्यालाई परींद नैद डाय़ाचिए। दाऊद राजाए ओजरा ब डा ज़, ननी परीव ओखार ब डा ज़, छकाल्न्याकाव ज़गैव सोम्पा ब डा ज़।”

17परमेस्वरए उपुरूस सोनो पाथाए ओब्याहोल्यानी मानुवाताव मिरालाई, “हुचिके,” है यारादोज़्यानी। नो पाँ थैज़्यावराए मनी, “हुचिके,” ज़ है उलिरक। है जैद जो री छोस्ज़्या, हो अजम्बरी जुनी याज़्याव री ओपैवा भरी अइज़ ओना उहुक।

### तुपैन्या पाँर

18डा यूहन्नाए आव पोस्तोकोलाव सर्सिउ पाँ थैज़्यावरालाई है डादाचिज़्या — जोए आव सर्सिउकिन छुत आगल्या पाँ चा-ज़्याव, होलाई परमेस्वरए आव पोस्तोकोलाव सर्सिउ नुल्पा नुल्मार होए ओक्याँत ज़ चाःदिरिज़्याव। 19 जोए फरी आव सर्सिउलाई ओघतैकिन, परमेस्वरए होलाई ज़ आव पोस्तोकोलाव सर्सिउ नो स्वर्गत लिज़्याव नोए ओपो सोनो अजम्बरी जुनी यान्या सीए ओसैनी उजुँ मादैन्या जैरिज़्याव।

20आव डासरो पाँत ओल ओसाची याज़्यावए है लिज़्या, “डा हतपत ज़ डाहुरिज़्या।” है जैद डा यूहन्नाए मनी है डालिज़्या, “हैज़ ओताक, प्रभु येसु, चाँदो ज़ घुहुनी।”

21जे परमेस्वरए उमीरास गेप्रभु येसुए उयुँ प्राइँ जेल्योदा ओगराँक। आमेन।

**साःरो बाचा**

Kham, Western Parbate: साःरो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

---

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd